

Nagsayaat ti sitwasyon tapno ad-adda nga iyabante ti demokratiko a rebolusyon ti umili

Komite Sentral
Partido Komunista ng Pilipinas

Siraragsak a rambakan tayo ti maika-57 nga anibersaryo ti naindaklan a Communist Party of the Philippines! Iti daytoy nga istorikal nga okasyon, idandanun ti Komite Sentral ti nabara a kablaaw iti amin a kadre ken kameng ti Partido, kadagiti amin a kameng dagiti kaalyado a rebolusyonaryo nga organisasyon iti National Democratic Front, kadagiti gagayyem, kadagiti kakadwa a komunista, pwersa a rebolusyonaryo ken anti-imperyalista iti nadumaduma a paset ti lubong, ken iti intero nga umili a Pilipino.

Daytoy nga aldaw ket lagipen ken bigbigen tayo ti amin a banwar ken martir ti rebolusyon a Pilipino. Tumakder tayo a nakatag-ay ti gem-

gem tapno padayawan ti lagip ni Ka Jose Maria Sison, dadaulo a nangbuangay ti Komite Sentral ti Partido, a nagservi a tarabay ken lawag ti

Partido ken mano a kaputotan dagiti komunista ken rebolusyonaryo nga aktibista. Padayawan tayo met ti lagip ti amin a banwar ken martir ti umili a Pilipino, kabilang dagiti ipatpateg tayo a lider a nagservi iti Komite Sentral, dagiti Nalabbaga a mannakigubat ti New People's Army ken amin a kadre ken kameng a sipupuso a nangisagut ti sibubukel a biag da para iti pagimbagan ken pannakawayawaya ti amin a maida-



danes, dati a dadaulo nga interna-
syunal a mangibagi ti NDFP ken pa-
ngulo ti NDFP panel iti saritaan iti
kapyra, a pimmusay idi Hunyo idia
The Netherlands; ken ni Ka Maria
Malaya (Myrna Sularte), a pinatay ti
kabusor iti maysa a labanan iti ka-
banbantayan ti Butuan City idi Peb-
rero. Idanon tayo met ti panangsa-
ludo ken Ka Basavaraju, dati a ka-
buklan a kalihim ti Komite Sentral ti
Communist Party of India (Maoist)
ken ni Ka Madvi Hidma, kumander ti
People's Liberation Guerrilla Army
iti India ken iti dadduma pay a re-
bolusyonaryo iti nadumaduma a pa-
set ti lubong a nangidaton ti biag da
para iti internasyunal a proletarya-
do. Umadaw tayo ti inspirasyon iti
naririmat a biag da.

Kablaawan tayo met iti daytoy
nga aldaw ti amin a baro a kameng
ti Partido, nangruna dagiti kabataan
a kadre manipud iti intar ti masa
nga anakling-et, dagiti intelektwal
ken dadduma pay a saray ti kagimo-
ngan. Dakayo ti masakbayan ti Par-
tido ken ti rebolusyon a Pilipino.
Naanep kayo nga agadal, mangala ti
tarabay, patademen ti panunot ken





Espeyal nga Isyu | Disyembre 26, 2025

 ang.bayan@cpp.ph

Ti Ang Bayan ket ipabpablaak
ti Komite Sentral ti Partido
Komunista ng Pilipinas
dua a daras iti tunggal bulan

agbalin a napakumbaba iti panang-
sango iti karit iti panangidaulo iti
nadumaduma a tay-ak ti rebolusyo-
naryo a trabaho ti Partido. Kabinna-
dang yo iti panangibaklay ti nada-
dagsen a rebbengen dagiti natatae-
ngan ken addaan kapadasan a kadre
ken kameng ti Partido a nakasagana
nga agbalakad ken mangibinglay iti
kapadasan da.

Itag-ay tayo ita nga aldaw ti
Marxismo-Leninismo-Maoismo, ti
natibker a teoretikal a pundasyon a
pagtaktakderan ti Partido. Daytoy ti
unibersal na teorya para iti panna-
kawayawaya ti dasig a mangmang-
ged ken ti amin a maidadanes a da-
sig. Pasingkeda tayo dagiti basaran
a prinsipyo ti Partido ken ti progra-
ma daytoy para iti demokratiko nga
rebolusyon ti umili babaen ti naun-
day a gubat ti umili, tapno gibusan ti
mangidadanes a sistema a malako-
lonyal ken malapyudal, ibagsak ti
tallo a basaran a parikut nga imper-
yalismo, pyudalismo ken burukrata-
kapitalismo, ken gun-oden ti demok-
rasya ken nailyan a wayawaya tapno
parnuayen ti kundisyon para iti so-
syalista a masakbayan.

Sumsumrek tayo tatta iti mai-
katlo a tawen ti tignay panagilinteg
tayo, a ti kangrunaan ket maysa a
Marxista-Leninista-Maoista a tignay
panagadal. Iti anag ti tignay pana-
gilinteg, sinubli tayo nga inadal da-
giti kapadasan ken kritikal-iti-bagi
nga intudo tayo dagiti nagkapuyan
ken dagiti nagkamalian tayo. Ma-
ragsakan ti Komite Sentral nga iyu-
lat nga agtultuloy nga agbungbunga
ti tignay panagilinteg tayo ken nag-
gun-od kadagiti signipikante a pa-
nagabante iti ideolohiya, pulitika
ken organisasyon. Agtaltalek tayo
nga iti agtultuloy a panagpinget ti
amin a kadre ken kameng ti Partido,
iti panangidaulo ti Komite Sentral,
magun-od tayo ti ad-adda a dadak-
kel a balligi kadagiti umay a tawen.

Iti tarabay ti Marxismo-Leninis-
mo-Maoismo, natadem nga amirisen
tayo dagiti kangrunaan a kontradik-
syon a mangbukbukel ti agdama a
sangsangwen a sitwasyon iti pagil-
yan ken intero a lubong. Imtuoden
tayo ti mataginayon a krisis ti ma-

lakolonyal ken malapyudal a sistema
iti Pilipinas ken ti agpapauten nga
istagnasyon ti sangalubongan a sis-
tema a kapitalista. Mangiluklukat
daytoy ti adu ken dadakkel nga
oportunidad tapno iyabante ti tari-
gagay ti dasig a mangmangged ken
amin a maidadanes ken magungun-
dawayan a dasig para iti wayawaya.

Iti rugi ti agdama a tawen ket
ninamnama tayo ti panagbettak ti
krisis ti agar-ari a sistema iti sidong
ti rehimen US-Marcos. Ngem naar-
tapan daytoy ti kinapardas ti pa-
nagluom ken panagbettak ti sitwa-
syon manipud katengnga ti ta-
wen. Daytoy ket saan laeng a tanda
ti kinauneg ti krisis iti ekonomya
ken kagimongan, nu di ket nang-
nangruna pay, ti agluplupyas a
pungtot ti umili a Pilipino iti pana-
ngidadanes ken panangparigat ka-
dakwada ti mananggundaway ken
agtatakaw nga agar-ari a dasig.

Sigurado nga agtuloy pay iti ma-
sangwanan ti saan a marisrisut a kri-
sis iti sango ti saan a marukod a ko-
rapsyon, panangimula ti pasista a te-
rorismo ken napeklan a panagpakaa-
so-aso ti rehimen Marcos. Ti rehi-
men Marcos tatta ti pinakakon-
sentrado a langa ti panangidadanes
ken panangparigat iti umili a Pilipi-
no. Iti umay a tawen, sigurado a du-
makkel ken lumawa pay ti tignay
protesta a nagdalluyon kadagiti na-
palabas a bulan tapno pagsungbaten
ken padisyon iti poder da Marcos ken
Duterte a mangibagbagi tatta iti pi-
nakareaksyunaryo a bunggoy dagiti
agar-ari a dasig. Kagiddan daytoy,
sigurado a bumtak met dagiti nasak-
nap a panaglaban iti kaaw-awayan iti
sango ti narungso a panag-agaw ti
daga ken panagtakaw iti kinabak-
nang ti pagilyan.

Pudno la unay a nakasaysayaat
a sitwasyon tatta iti Pilipinas tapno
idaulwan ti Partido ti ad-adda a pa-
nagabante ti demokratiko a rebolu-
syon ti umili babaen ti naunday a
gubat ti umili. Gammatan tayo ti
gundaway tapno ad-adda pay a pa-
pigmaen ti Partido ken intero a rebo-
lusyonaryo a tignay, ken tannawa-
gan ti dakkel a panagabante iti ma-
sangwanan.

I. Dagiti kumarkaro a susik iti sango ti saan a marisut a krisis ti sangalubongan a sistema a kapitalista

Iti intero a lubong ket daydayyegen ti uppat a kangrunaan a kontradiksyon: iti baet ti monopolyo a burgesya ken dasig a mangmangged, iti baet ti imperyalismo ken maidadaneng nga umili iti intero a lubong, iti baet dagiti imperyalista a bileg ken dagiti pagilian a tumaktakder para iti nailyan a panagwaywayas ken iti baet dagiti agriribal nga imperyalista a pagilian. Iti agdama, ti kumarkaro a susik iti pulitika, pinansya, ekonomya, linnakwan ken militar iti baet dagiti kadakkelan nga imperyalista a pagilian ti prinsipal a kontradiksyon, nangruna iti sango ti awan sarday a panagipataw ti imperyalista a US iti hegemonya na iti intero a lubong. Daytoy ti prinsipal a kontradiksyon a mangsukukog ti agdama a sitwasyon iti sangalubongan.

Bumbumtak iti nadumaduma a paset ti lubong dagiti armado a binusor, a kangrunaan nga ituntunda ti panagsugsog ti imperyalismo a US. Daytoy ket nairut a nakasilpo iti nagpauten nga istagnasyon ti ekonomya dagiti kangrunaan a kapitalista a pagilian a saan a marisut ti monopolyo a burgesya. Resulta daytoy ti agtultuloy a krisis ti sobra a produksyon iti dandani amin nga industriya, ken dumakdakkal nga imbentaryo dagiti saan a malako a tagilako. Sobra-sobra ti produktibo a kapasidad, nangruna dagiti kangrunaan a pagilian nga industriyalisado. Daytoy ket gapu ti panagkamkamat ti agkakaribal a kumpanya nga atiwen ti tunggal maysa iti produksyon ti kaadwan a tagilako.

Adda ti sobra a produksyon iti dandani amin nga industriya gapu iti agtultuloy a panagpadur-as kadagiti pwersa iti produksyon, partikular dagiti panagabante iti teknolohiya (kabilang ti panagaramat ti *artificial intelligence* wenno AI). Adda ti aglablabes a kapasidad iti produksyon dagiti ramit nga elektroniko, semikonduktor, dagiti baterya, lugan a de-kuryente ken de-gasolina, dagiti *solar panel*, asero (landok), langis ken petrolyo, kemikal, barko, transportasyon a komersyal, eroplano ken adu pay. Adda met ti sobra-sobra a produksyon iti gistay amin a produkto a pang-agrikultura (bagas, mais, soya, trigo ken dadduma pay), nangruna kadagiti kapitalista a pagilian.

Madaddadael wenno masaysa-

yang dagiti pwersa iti produksyon. Gapu iti sobra a produksyon, adu nga industriya ti mapatpataray a nababbaba ngem iti kapasidad iti produksyon. Idia US kaspangarian, 60%–70% laeng ti kapasidad daytoy iti produksyon dagiti lugan ti maar-aramat. Idia Germany, adda iti 70% laeng ti kapasidad iti kabuklan a produksyon ti maar-aramat, gapu na a saan a maar-aramat ti binilyon a dolyar kadagiti ramit iti produksyon. Idia China, addaan kapasidad dagiti pabrika ditoy nga agprodus ti agingga ti 45 milyon a de-kuryente a lugan (*e-vehicle*), ngem saan a naan-anay a maus-usar gapu ta ti linnakwan iti sangalubongan a pagtagilakwan ket adda iti 16–18 milyon laeng. Umad-adu dagiti kumpanya a maluglugi wenno maal-alun-on iti sango ti nainget a kapitalista a kumpetisyon.

Napaspas a dumakdakkal tatta ti labutab ti AI a pagmamauyongan ti dadakkal a monopolyo a burgesya. Mano a trilyon a dolyar ti maibukbok iti tay-ak ti AI kadagiti sumaruno a tawen, iti saan pay a maartapan a kadakkal ti panagpuonan iti imprastruktura ken bono, a nalablabes iti manamnama a demand ken mapastreng daytoy. Maikumkumpara daytoy tatta iti labutab ti “dotcom” idi dekada 1990 a saan a nagbayag ket bintak ken nagresulta iti maysa a krisis iti pinansya.

Ad-adda a kimmaro ti problema ti panagsisante iti adu a mangmangged, panagkissay iti aldaw ti trabaho wenno panagserra dagiti pabrika.

Idia US, dandani 560,000 kumpanya ti nabangkrap iti maysa a tawen manipud Setyembre 2024, nasurok 10% a panagadu kumpara iti tawen, kangatwan manipud 2010; kabilang ti 32 nga addaan gatad a sobra iti \$1 bilyon, a nagserra iti 12 a bulan manipud Setyembre 2024. Iti napalabas a sangapul a tawen, saan a bumaba iti 100,000 a kapitalista a pagtatalonan idia US ti nagkupin gapu iti agtultuloy a panagbagsak ti presyo dagiti tagilako da. Idia Germany, manamnama a dumanon iti kabuklan a 22,000 ti agserra a kumpanya iti intero a tawen (60 kada aldaw), kangatwan iti maysa a dekada. Idia UK, nasurok 2,000 kumpanya ti binulan nga agrikrikep tatta a tawen, bayat nga adda iti 50,000 empresa ti adda iti kritikal a sitwasyon. Idia China, manamnama a 15 kumpanya laengen (manipud 129 kumpanya) ti mabati a nakatakder iti industriya ti *e-vehicle*.

Agtultuloy a ngumatngato ti disempleyo iti intero a lubong. Iti sektor ti teknolohiya, mapatta-patta a dumanon iti nasurok 200,000 ti masisante a mangmangged agingga agtapos ti tawen (70% daytoy iti US), kabilang ti 24,000 iti Intel, 14,000 iti Amazon, 13,000 iti Verizon ken 9,000 iti Microsoft. Iti industriya ti lugan idia US, dumanon iti 15,000 (20% a nangatngato kumpara iti napalabas a tawen) ti naiyanunsyo a masisante tatta a tawen. Mapatta-patta nga agingga 60,000 a mangmangged iti sektor ti de-kuryente a lugan idia China ti naikkat iti trabaho manipud 2024. Nasurok 48,000 empleyado met ti United Parcel Service ti naikkat iti trabaho gapu iti panagbagsak dagiti deliberi.

Naidasay iti istagnasyon agingga a nabuntog ti panaglangto ti sangalubongan nga ekonomya. Dagiti ekonomya ti amin a sentro ti kapitalismo ket sumangsango iti dumakdakkal a pangta ti resesyon. Ti nabuntog a panaglangto dagiti eko-

nomya ket dumanonen iti dua a dekada, manipud idi bintak ti krisis ti pinansya idi 2008. Nagballatek ti sangalubongan nga ekonomya idi 2022 kalpasan a nagsuwek idi pandemya ti 2020–2021. Tatta a tawen, adda dagiti panagtantya, karaman ti World Bank ken IMF, a saan a lumangto ti sangalubongan nga ekonomya labes iti 2.3%, nababbaba kumpara iti nababa met a 2.5% a panaglangto idi 2024. Daytoy ket iti sango ti nasaknap a panagserra dagiti empresa, panagsisante kadagiti mangmangged ken nababa a demand gapu iti nangato a tantos ti implasyon, nangruna kadagiti kala-kal a pangkonsumo.

Ti ekonomya ti US ket agtaltalinaed nga adda iti ngarab ti resesyon a mataytaya a lumangto ti 1.7%–2% tatta a tawen. Dandani kagudwa (wenno 22) dagiti estado iti US ti addan iti resesyon. Iti sidong ti patakaran nga “America First” ti guberno a Trump, naipatungpal dagiti desperado nga addang tapno kano balbaliw a biagen ti ekonomya ken industriya. Kabilang ditoy ti panangngato ti taripa iti dandani amin nga maang-angkat a tagilako ti US nga addaan deklarado a panggep a salakniban ken suportaran ti lokal nga industriya ken manupaktura. Nu pay kasta, iti napalabas nga 11 a bulan, agtaltalinaed a nakasardeng wenno kimmapsut pay ti produksyon nga industriyal, kabilang ti landok ken dagiti lugan, iti sango ti sobra a sangalubongan a produksyon ken im-bentaryo.

Manamnama met a lumangto ti 1.3% ti ekonomya dagiti pagilyan iti European Union, kabilang ti bagsak nga ekonomya ti Germany a manamnama a dumanon laeng iti 0.2% (manipud -0.3% idi 2024). Adda met iti ngarab ti resesyon ti United Kingdom manipud pay iti napalabas a tawen. Bimmagsak iti -2.3% ti Japan idi maikatlo a kwarto ti tawen, ken saan a manamnama a lumangto labes iti 1% iti intero a tawen. Agtultuloy met a bumunbuntog ti panagdakkel ti ekonomya ti China a manamnama a dumanon iti 5% laeng

(manipud nasurok 10% a panaglawa idi 2000–2010), iti sango ti pannakalugi dagiti naisardeng a proyekto a *real estate* (kabilang dagiti sobrasobra a kondominyum ken pasdek pang-upisina), naurnong a binuntuan a saan a mabayadan a lokal nga utang ken panagbagsak ti panagpuonan iti manupaktura ken imprastruktura.

Iti kabuklan, mapatta-patta nga adda 40–60 pagilyan ti adda iti ngarab tatta ti resesyon. Malaksid kadagiti kangrunaan a sentro ti kapitalismo, kabilang met ditoy ti sumagmamano nga abante nga ekonomya idiyay Europe kas ti Austria, Germany, Italy, France ken Switzerland, nga agpapada a negatibo wenno awanan ti tantos ti panaglangto ti ekonomya da, nayon pay ti mano pulo a pagilyan nga atrasado.

Ti nakaro a krisis ti sistema a kapitalista ket ad-adda a mangpakpakaro iti pannakaperdi ti aglawlaw ken krisis iti klima. Agdadata nga agkedkedked dagiti dadakkel a kapitalista a pagilyan nga agsardeng iti panagkamkam kadagiti natural a kinabaknang ken naata a materyales, a makagapu iti kumarkaro a polusyon nga industriyal ken panangngato ti temperatura iti intero a lubong. Awan maamay ti tinawen a pammarang a “climate change conference” nga indaulwan ti UN, kabilang ti naangay itay nabiit idiyay Brazil.

Iti tengnga ti krisis ti sangalubongan a sistema a kapitalista, ad-adda a bumagbagsak ti saan nga industriyalisado, agraryo ken atrasado nga ekonomya dagiti pagilyan a kolonyal, malakolonyal ken malapudal. Dagitoy a pagilyan ket pinilay dagiti mano dekada a patakaran a neoliberal a nangilukat kadagitoy iti panangitambak ti gangannaet a tagilako ken panaggamrud ti gangannaet a kapitalista a panagpuonan. Gapu iti saan a patas a sinnukatan, agsagsagaba da iti mataginayon a depisito iti linnakwan, krisis iti pinansya ken panagsanggir iti utang. Bayat nga uming-inget ti kumpetisyon dagiti monopolyo burgesya para iti pagalaan ti kalakaan a naata a

materyales, ad-adda a pagiinnagawan dagitoy a pagilyan dagiti imperyalista a bileg. Agsagsagaba ti mano a bilyon nga umili kadagitoy a pagilyan iti sango ti nasaknap a disempleyo, nababa a sweldo, panag-agaw ti daga ken pagbiagan ken dadduma pay a langa ti panagparigat ken panangidadanes.

Agtultuloy nga agbawbaw-ing iti panagutang dagiti pagilyan iti gagem a makalasat iti krisis dagiti ekonomya da, pondoan dagiti subsidyo ti estado para kadagiti malugluga a kumpanya, pondoan dagiti imprastruktura ken dumakdakkel a gastos iti depensa. Iti uneg laeng ti umuna nga innem a bulan ti 2025, timmayok ti \$21 trilyon ti sangalubongan nga utang ken iti \$340 trilyon iti katengnga ti tawen. Ibagbagi ti kabuklan a sangalubongan nga utang ti dandani 290% ti kabuklan a sangalubongan a produksyon, dandani kabatog ti kangatwan a naganon idi 2023. Mayorya ti sangalubongan nga utang ket iggem ti US, Japan, China ken sumagmamano a mayor a pagilyan idiyay Europe. Ingkatlo (1/3) daytoy ket utang ti US. Ti pangpubliko nga utang ket manamnama a dumakkel manipud \$102 trilyon idi agtapos ti 2024 agturong \$115 trilyon iti agtapos ti tawen. Dumanon iti \$31 trilyon ti pangpubliko nga utang dagiti atrasado a pagilyan, doble a panagdakkel iti napalabas a 15 tawen. Saan a bumaba iti 35 a pagilyan ti agpegpeggad a saan a makabayad kadagiti utang da.

Sungsungrodan ti kumarkaro a sangalubongan a krisis ti kapitalismo ti nainget a risiris dagiti imperyalista ken dagiti susik iti lubong. Inyatnag ni Trump dagiti nayon a taripa iti gis-tay amin a pagilyan tapno makaala kadagiti konsesyon iti linnakwan (kabilang ti panagpastrek kadagiti adu a produkto manipud US ken dagiti kontrata iti panagilako kadagiti sarplas a ramit militar). Iti daytoy nga inaramid na, ad-adda a pinakaro na ti kumpetisyon iti ekonomya ken pinauneg na dagiti sentimyento nga anti-US iti intero a lubong.

Dumakdakkal ti pangta ti panagbettak dagiti mayor nga armado a risiris iti nadumaduma a paset ti lubong, kagiddan ti dumakdakkal a pondo a maibukbukbok dagiti imperyalista iti militar ken depensa. Timmayok daytoy iti 9.4% idi 2024 agturong \$2.72 trilyon, kangatwan a panagtayok iti napalabas a nasurok tallo dekada. Agtultuloy daytoy a panagtayok tatta 2025. Dumanon iti \$1 trilyon ti gastos militar ti US tatta a tawen. Iti balangkas ti baro a National Security Strategy (2025) ti US (a nakaturong kangrunaan iti China ken Russia), indeklara daytoy ti panggep a padur-asen ti “kabilegan, kapiagsaan ken kaabantean iti teknolohiya” a pwersa militar.

Taltalmegan ti US a rumbeng nga artapan daytoy ti China iti dakdakkal a pwersa iti kabaybayan ken “first island chain” iti aglikmot ti pagilyan. Panggep kano daytoy a liklikan ti kumprontasyon,” ngem ad-adda laeng a padpadakkelen daytoy ti posibilidad a magangtan ti armado a binnusor ken gera. Iti bukod na a paset ti lubong, ikaskasa tatta ti US ti plano a rauten ti Venezuela (idiay South America) iti lingged ti “panaglaban iti kartel ti droga” tapno pabagsaken ti anti-imperyalista a gubyrerno ni Maduro, ken itakder ti maysa nga aso-aso a gubyrerno. Kalpasan ti agbaybayag a gera idiay Ukraine a sugugsogan ti US ken NATO, idurduron tatta ti US ti maysa a katulagan tapno pagbingayan ti rekursor ken dagdaga ti pagilyan. Idia Middle East, tuluy-tuloy a kabinnadang ti US ti Zionist nga estado ti Israel iti gera a henosidyo laban iti Palestine a nangpapatay iti saan a bumaba iti 67,000 a Palestino iti dua a tawen a panagbombomba idiay Gaza manipud Oktubre 2023. Iti laksid ti “ceasefire” nga inballaet ti US idi Oktubre, agtultuloy dagiti panagatake dagiti pwersa a Zionista a nagresulta iti pammapatay iti saan a bumaba iti 400 a Palestino. Ikaskasa ti US ti plano daytoy a kontrolen ti mano a paset ti Gaza Strip, uray pay kaniwas daytoy iti plano ti Israel a kamkamen ti

sibubukel a dagdaga. Nagtinnulungan ti US ken Israel a bombaen ti Iran, a nangsalaknib iti pagilyan ba-baen kadagiti kontra-atake.

Agtultuloy ti panagpapigsa ti “kumprehensibo nga estratehiko a panagtinnulong” ti Russia ken China iti langa ti pinapigsa a linnakwan (nangruna iti langis ken enerhiya) ken kooperasyon a militar. Agtultuloy a napalawa ti alyansa a BRICS (Brazil, Russia, India, China ken South Africa) a tatta ket addaanen sanga-pulo a kameng a pagilyan kalpasan ti panagkameng tatta a tawen ti Indonesia (kasaruno ti Egypt, Ethiopia, Iran ken United Arab Emirates).

Iti duron daytoy, ken kas bales a sungbat kadagiti taripa ni Trump, agtultuloy nga ikagkagumaan ti adu a pagilyan nga umadayo iti panagaramat iti dolyar kadagiti transaksyon a pangpinansya, uray pay agtaltalinaed daytoy a dominante. Kabilang ditoy ti linnakwan iti langis ti Saudi Arabia ken dadduma pay a pagilyan iti Middle East (nangruna iti China), linnakwan a yuan-ruble ti China ken Russia kasta met ti linnakwan usar ti lokal a kwarta iti ASEAN. Manipud iti dandani awan sakbay ti 2022, dumanon tatta iti 20% ti kabulkan a linnakwan iti lubong ti saan nga agus-usar ti dolyar, a makagapu iti turongen a panagbaba ti balor daytoy, ken ti pumigpigsa a linnakwan ti balitok. Nangrugi idi 2022–2024 ti sobra iti 1,000 tonelada a linnakwan, manipud iti kadawyan a tinawen a linnakwan a 450–500 tonelada idi 2010–2021.

Ti agtultuloy a krisis kadagiti kapitalista a pagilyan ket agituntunda ti uming-inget a risiris dagiti dasig. Agtultuloy nga uming-inget dagiti dangadang ti mangmangged kadagiti sentro a kapitalista, kabilang ti welga dagiti mangmangged ti Amazon iti US ken nadumaduma a pagilyan. Bimtak met daytoy katengngaen ti tawen ti nasaknap a welga dagiti mangmangged idiay China para iti umento ti sweldo, partikular iti kumpanya a BYD (agar-aramid ti de-kuryente a lugan). Bimtak met dagiti nasaknap a tignay

protesta dagiti mangmangged kadagiti sangladan ti Japan idi Marso agingga Mayo. Idia Europe, bimtak tatta Disyembre dagiti kabulkan wenno aggigiddan a welga dagiti mangmangged ken umili idiay Belgium, The Netherlands, Portugal, Italy ken France laban kadagiti patakaran ti panagsalimetmet (*austerity*), a kangrunaan a mangdangran iti pensyon, sweldo ken dagiti serbisyo iti gimong. Bimtak met dagiti mayor a welga kadagiti napalabas a bulan idiay Germany, Spain, United Kingdom ken dadduma pay a pagilyan.

Ti nakadkadlaw a panagbaw-ing dagiti estado kadagiti garapal a pasista a patakaran ket reaksyon da iti pumigpigsa a panaglaban dagiti mangmangged ken umili. Idia US, kumarkaro ti awtoritarianismo ni Donald Trump iti agdadata a panangrangis na kadagiti linteg ken ligal a proseso iti iyar-aramid na a nararangas a *crackdown* laban kadagiti imigrante iti US, a mangbukbukel ti dakkel a bulto ti dasig a mangmangged. Iti sugug ti monopoly a burgesia, pumigpigsa dagiti partido ken tignay a pasista ken konserbatibo, ken adda dagiti mabotbotosan iti gubyrerno. Agtultuloy a kumarkaro dagiti atake laban kadagiti Muslim ken Arabo (kakarwan idiay US iti napalabas a tallo a dekada, kagiddan ti panangipawil ti gubyrerno a Trump kadagiti protesta a maka-Palastina), dagiti Black ken Latino idiay US, dagiti LGBT ken migrante idiay Europe. Paset ti pumigpigsa a turongen a pasista, mapatpatungpal dagiti linteg ken patakaran a nasaknap a mangipawpawil kadagiti karbengan a sibil, kas ti panagpapigsa ti *mass surveillance*, panagaramat kadagiti *drone*, AI ken dadduma pay a teknolohiya a manglablabasing kadagiti karbengan iti pribasiya. Kalpasan ti nasurok tallo a tawen, narungsot latta ti gera a henosidyo ti Zionista nga Israel idiay Gaza. Iti duron ti US a kangrunaan, mapakpakapsut ti United Nations babaen ti panangipaidam ditoy ti pondo, nangruna kadagiti ahensya daytoy para iti karbengan-tao.

Ti pumigpisa a pasisasyon wenno turongen a pasista dagiti estado idia US ken dadduma pay a pagilyan ket mangidurduron kadagiti umili a papigsaen dagiti dangadang nga anti-pasista iti nadumaduma a paset ti lubong. Naangay dagiti mayor a rali ken protesta nga anti-pasista, kabilang ti 7-milyon katao a rali iti nasurok 2,700 a taripnong idia US laban iti panagari-ari ni Trump. Idia Europe, naangay ti dakkel nga anti-pasista a rali idia Netherlands, France, Germany, UK, Norway ken dadduma pay a pagilyan. Agtultuloy dagiti nasaknap a demonstrasyon ti minilyon nga umili iti nadumaduma a paset ti lubong laban iti agtultuloy a henosidyo ti US ken Zionista nga estado idia Gaza.

Bumbumtak met dagiti dangadang ti masa kadagiti pagilyan nga atrasado, iti sango ti agkakangato a presyo dagiti gagatang, nababa a sweldo, panagtenag ti pagrukodan ti biag, korapsyon ken nabarayuboy a panagbiag dagiti upisyal ti guberno, padagsen a buwis, panangbusbos ti kwarta ti guberno kadagiti pangpasikat a proyekto, pannakabulok dagiti serbisyo a panggimong ken nakaro a saan a panagpapatas. Mainayon pay dagiti protesta laban iti korapsyon idia Kenya, Nepal, Indonesia, Morocco, Madagascar, Peru, Pilipinas

ken dadduma pay a pagilyan. Adu kadagiti ti naawagan a “protesta a Gen-Z” gapu iti nalawa nga isponenta a panagtignay dagiti kabataan nga agsagsagaba iti tengnga ti nauneg a krisis a sosyo-ekonomiko. Adda ti sumagmamano kadakwada nga inaramat dagiti reaksyunaryo wenno repormista a partido, ngem adu met ti nakonsolida kas progresibo ken rebolusyonaryo.

Nagsayaat ti kundisyon iti lubong tapno agpapigsa dagiti proletaryo a rebolusyonaryo iti nadumaduma a paset ti lubong, ken itakder dagiti partido komunista, tapno agserbi a silaw ti masa a mangmangged ken dadduma pay a maidadanes ken magungundawayan a dasig. Iti nadumaduma a pagilyan, agpappigsa dagiti proletaryo a rebolusyonaryo a grupo ken partido iti ideolohiya, iti panangsubli ken panangpauneg iti pannakaawat iti Marxismo-Leninismo-Maoismo ken panangipakat ditoy iti sangsangwen da a kongkreto a kasasaad. Pakakitaan ti daytoy a panagpinget ti naangay a liman a kumperensya a teoretikal ti NDFP manipud Oktubre 2023, a dinarayan ti adu a partido komunista ken dadduma pay nga organisasyon a rebolusyonaryo tapno talantanen ti nadumaduma a napapateg a pakaseknan a sangsangwen ti prole-

taryo iti intero a lubong.

Kadagiti pagilyan a nakatakder dagiti partido komunista, adda iti bugas ken unaan ti proletaryo iti nadumaduma a langa dagiti demokratiko a dangadang ti masa, panangbukel ti nalapad a nagkaykaysa a prente para iti panangsalaknib iti interes ken pagimbagan ti nalawa a masa laban kadagiti imperyalista a patakaran a neoliberal, programa a parigat, korapsyon ken pasismo ti reaksyunaryo nga estado. Idia India, Turkey, Peru, Colombia, Pilipinas ken dadduma pay a pagilyan, agtultuloy nga agpingpinget dagiti partido komunista iti pananglaban iti terorista a todo-gera a represyon ken panangidaulo iti rebolusyonaryo nga armado a dangadang.

Naluom la unay ti sitwasyon para iti panagtaud ken pananglangto dagiti partido komunista ken para iti panangpapigsa kadagiti rebolusyonaryo a dangadang iti intero a lubong. Ti kundisyon ti krisis a pinarnuay ti kapitalista a sistema ket nadam-eg a daga para iti panagsaknap dagiti rebolusyonaryo nga ideya ken nalawa a panagtignay ti masa. Sentral ti papel dagiti partido komunista iti panangidaulo iti dasig a mangmangged ken dadduma pay a maidadanes a dasig, iti dangadang para iti wayawaya, demokrasya ken sosyalismo.

II. Kumarkaro a krisis iti ekonomya ken pulitika iti sidong ti rehimen US-Marcos

Ad-adda a maitentennag iti krisis ti agar-ari a sistema a malakolonyal ken malapyudal iti sidong ti panagari ti rehimen US-Marcos. Ad-adda a bumuybuyok ti sistema a rinuker iti kaunggan, iti sango ti garapalan a korapsyon ni Marcos ken dagiti pada na a burukrata-kapitalista a mannibrong, ti panangakup ti higante a kinabaknang dagiti pabpaboran na a burges kumprador, ti kumarkaro a panagtakaw dagiti gangannaet a kapitalista iti kinabaknang ti pagilyan, ti nasaknap a panangagaw iti daga ken pagbiagan ti masa ken ti kumarkaro a panagsagaba ken pannakaidadanes ti umili a Pilipino. Pudno la unay a nairut a dawdawat ti sitwasyon ti rebolusyonaryo a panagbalbaliw tapno iwaksi ti daan a dana ken itunda ti pagilyan iti dana ti wayawaya, demokrasya ken panangrang-ay.

Iti sango ti agtultuloy a krisis ti sangalubongan a sistema a kapitalista, ti lokal nga ekonomya ti Pilipinas ket maguyguyod iti naun-uneg a krisis. Agtultuloy a laplapdan ti im-

peryalismo a US ken dagiti agar-ari a dasig ti panagdur-as dagiti pwersa iti produksyon, gapu na nga agtaltalinaed daytoy nga atrasado ken saan nga industriyalisado.

Awan met ti kabaelan ti lokal nga ekonomya a sungbatan ti kasapulanan ti umili ken parang-ayen ti pagilyan. Ti lokal a produksyon ket nakasanggir iti panangangkat kadagiti tagilako a pangkonsumo ken pangproduksyon, ken nakaturong iti panagiluwas kadagiti naata wenno apagapaman laeng a naproseso a materyales ken dagiti tagilako nga naasembol manipud kadagiti inangkat a pyesa. Ti ekonomya ti pagilyan ket agtultuloy a nakasanggir iti gangannaet a kapital ken panagutang, uray pay idurduron ti World Bank a padakkelen ti paset ti lokal a panagutang.

Gapu iti saan a balanse a linnakwan, agtaltalinaed a dakkal ti permanente a depisito wenno pannakalugi iti linnakwan, a dimmanon iti \$54 bilyon idi 2024 (manipud \$52 bilyon idi 2023). Manamnama nga agtaltalinaed daytoy iti kasdiay met laeng a tukad iti 2025. Nagsuwak ti nasurok 83% ti sarplas iti *balance of payments* wenno balanse ti ganganet a transaksyon (linnakwan, pastrek ken remitans manipud balasiw-taaw, serrek ti gangannaet a pautang, ayuda wenno panagpuonan) ti Pilipinas, manipud \$3.7 bilyon idi 2023 agturong \$609 milyon idi 2024, iti laksid nga awan pay ti kas kadakkel ti \$38.34 bilyon a remitans nga inserrek dagiti migrante a mangmangged a Pilipino.

Timmayok ti panagutang ti gubyrno a Marcos agturong ₱17.5 trilyon idi Oktubre 2025 (kabilang ti ₱5.5 trilyon wenno \$93 bilyon a gangannaet nga utang), 40% a panagdakkal manipud nagtugaw ni Marcos idi 2022, tapno ilasat ti depisito iti linnakwan, punwan ti *balance of payments* ken pondoan dagiti dadakkel ngem saan a produktibo a proyekto a pang-imprastruktura.

Agtultuloy a bumunbuntog ti lokal a manupaktura gapu iti panagbassit ti order wenno panagkapsut ti linnakwan iti sangalubongan a pagtagilakwan. Kabilang ditoy ti dandani 5% a panagbaba ti eksport dagiti produkto nga elektroniko kas kadagiti semikonduktor iti umuna a paset ti tawen, a mangbukbukel ti dakkal a paset ti gangannaet a panagpuonan iti Pilipinas ken 55%–60% ti iluluwas ti pagilian.

Agtaltalinaed a nababa ti produksyon iti agrikultura, uray pay adda ti bassit a panagbawi idi 2025 kumpara iti 2.2% a panagakikid idi napalabas a tawen. Kangrunaan a makagapu ditoy ket ti agtaltalinaed nga atrasado a ramramit, nababa a tukad ti produksyon ken bulnerabilidad kadagiti bagyo ken layus. Adda a dimmages ti lokal a produksyon iti agrikultura gapu iti liberalisasyon iti importasyon ti bagas (a dimmanon iti kadakkelan a 4.8 mil-

yon a tonelada idi 2024) ken dadduma pay a produkto a nagresulta iti pannakalugi dagiti mannalon ken panagkapsut ti produksyon. Kapada a sitwasyon ti mapadpadasan iti sektor ti panagkalap, manukan ken babuyan.

Markado ti panagdakkal ti bilang dagiti naawanan ti trabaho. Manipud Abril 2024 agingga Abril 2025, mapatta-patta a dumanon iti 500,000 trabaho iti manupaktura ti napukaw, kabilang ti 76,000 a trabaho iti sektor ti semikonduktor ken elektroniks. Tatta a tawen, napukaw ti nasurok 300,000 trabaho. Ginasut a ribo met a drayber ti dyip, mangngalap, aglaklak iti palengke ken dadduma pay a babassit nga agsapul ti pabiagan ti maag-agawan ti pamastrekan iti sidong ti programa a pagnumnumaran dagiti kapitalista a gangannaet ken lokal.

Iti kaaw-awayan, minilyon ti naawanan ti trabaho iti napalabas a tawen gapu iti panagagaw ti daga, panagpatalaw, panagsukat ti usar ti rinibo nga ektarya a daga para iti *real estate*, dagiti minasan, plantasyon, dagiti proyekto a “renewable energy” ken dadduma pay. Mapilpilitan da nga agbalin a mangmangged-talon, agsapul ti nadumaduma a pamastrekan iti agraryo wenno natural nga ekonomya wenno sumrek kadagiti sentro nga ili. Nayon a parigat iti masa a mannalon dagiti patakaran ti pasista a panaglipit, nangruna ti limitado nga oras iti panagtrabaho iti talon nga iyat-atnag dagiti agop-operasyon a soldado ti AFP.

Pilit a kalkaluban ti gubyrno a Marcos ti nakaro a parikut ti kinaawanan ti trabaho. Tapno parwaren a nababa laeng ti tantos ti disempleyo (nasurok-kumurang 95%), saan a maibilbilang iti “pwersa ti tegged” ti 10–15 milyon a babbai nga awanan trabaho (a mayoria ket adda iti kaaw-awayan) ken umak-akem ti saan a mabayadan a trabaho kadagiti pagtaengan, malaksid pay iti mano a milyon a naikategorya a “dismayado a mangmangged” a saanen nga agbirbikok ti trabaho. Iti

bangir na, maibilbilang nga “addaan trabaho” uray dagiti “self-employed” ken dagiti “unpaid family workers” (nga iti aktwal ket saan a makabirok ti trabaho, nga iti kabuklan ket mangbukbukel ti 13–16 milyon wenno agingga 34% ti makunkuna nga addaan trabaho.

Nu iraman ti minilyon a babbai a naikkat iti “pwersa ti tegged” a maikategorya nga “agtagibalay” ken nu maikkat da iti bilang ti “addaan trabaho” nga iti aktwal ket awanan met ti pagsapulan, ti pudno a tantos ti disempleyo iti Pilipinas ket saan a bumaba iti 52% wenno nasurok kagudwa ti pwersa ti tegged iti pagilian. Saan pay a karaman ditoy ti dakkal a bilang ti “agkurang ti trabaho” wenno *underemployed*, nga iti dakkal a panawen ket awanan met ti trabaho, iti aktwal ket kabilang ti dadakkel nga adda iti kaaw-awayan.

Iti sango ti palalo a nakaro a parikut iti disempleyo, dumanon iti 2.47 milyon a Pilipino ti nagballasiw-taaw tapno agtrabaho idi 2024, kangatwan iti napalabas a lima a dekada, ken manamnama a kas kaadu ti bilang ti mainayon kadagiti migrante a mangmangged a Pilipino. Nasurok-kumurang met a 10 milyon dagiti “gig worker” a kabatog ti 22% ti kabuklan nga addaan trabaho. Karaman ditoy ti dandani 200,000 a “platform worker.” Maibilbilang kadagiti dandani 90,000 *delivery rider*, nga inaldaw nga agiinnuna kadagiti limitado nga order wenno pasahero, ken agsagsagaba iti terible a trapik, bayat a kiskissayan dagiti kapitalista nga agtagikwa kadagiti “app” ti bassit a sapul da.

Tuloy-tuloy nga agsusuwak ti tukad ti panagbiag ti mayoria ti umili, iti sango ti tuluy-tuloy a panagngato ti presyo dagiti gagatang, nangruna ti langis ken taraon. Agtaltalinaed a nangato ti presyo ti bagas nga adda iti ₱40–₱50 kada kilo. Tuloy-tuloy a ngumatngato ti gastos iti edukasyon, transportasi, salun-at, abang iti daga, dandum, kuryente ken dadduma pay a serbisyo, a dakkal a paset ket nego-

syo ti dadakkel a kapitalista.

Mapatta-patta nga addan iti ₱1,225 kada aldaw ti makabiag a sweldo tapno mabiag a disente ti lima-katao a pamilya. Nasurok-kumurang kagudwa laeng daytoy ti inaldaw a minimum a sweldo a ₱695 (manipud Hulyo) idia National Capital Region, ken ad-adda nga adayo ti nababbaba a minimum a sweldo iti nadumaduma a rehiyon. Naidasay iti kinarigat dagiti masa a mangmangged a makasapsapul laeng ti minimum a sweldo. Agan-anus da iti naiilet a barungbarong kadagiti syudad, ken sumangsango da iti pangta ti panagpatalaw kadagiti pagtaengan da. Minilyon nga awanan pagsapulan ti agpilpila ken nakasagana nga umawat ti barya kadagiti trabaho a kontraktwal wenno pana-panawen.

Adda iti kaaw-awayan ti masa a mannalon. Isuda ti mangbukbukel ti mayoria dagiti produktibo a dasig ti pagilyan, ngem ti kinaadu da ket mailemmeng kadagiti upisyal nga estadistika ti reaksyunaryo a gubyrno. Tapno ikalinteg ti panagbaybay-a iti kaaw-awayan ken parwaren a saanen nga agraryo ti ekonomya, saan a maibilbilang iti upisyal na estadistika ti reaksyunaryo nga estado ti dakkel a paset ti produktibo a populasyon iti kaaw-awayan kabilang dagiti mannalon a babbai ken ubbing a pumasaset iti produksyon.

Mayoria kadakwada ket awanan bukod a daga wenno addaan bassit a parsela laeng a taltalonen, wenno makitalalon laeng kas kasamak wenno tenante, wenno agrabtrabaho kas mangmangged-talon. Maka-padpadas da kadagiti kumarkaro a langa ti pyudal ken malapyudal a panaggundaway ken panangidadan, partikular iti langa ti nangato nga abang ti daga ken nakababbaba a tangdan. Nalablaves ti ip-ipan da a pigsa iti panagtrabaho ken bakbaklayen da ti nangato a gastos iti produksyon, nangato nga interes ken pannakailumlom iti utang, panangbarat kadagiti produkto da ken nangato a presyo ti gagatangen. Ad-adda a dimmages ti kasasaad da ga-

pu iti liberalisasyon iti panagangkat a nagresulta iti panaglayus ti imported a bagas, sibuyas, bawang ken dadduma pay a produkto a pang-agrikultura, kasta met ti panaglayus kadagiti taltalon da gapu iti panangkalbo iti kabanbantayan.

Ginasut a ribo ti mapatpatalaw iti bukod da a daga gapu iti nasaknap a panagkamkam ti daga dagiti apo't daga, burgesya kumprador ken dagiti burukrata kapitalista. Maar-aramat dagiti korte ken nadumaduma nga ahensya ti reaksyunaryo a gubyrno, ken masansan a maaramat ti pwersa ti militar ken pulis tapno ikkan-dalan ti panagpalawa dagiti plantasyon, minasan, dagiti proyekto nga ekoturismo, real estate ken "renewable energy" (kas ti nalalawa a *solar farms*) wenno proyekto para kano iti panangpababa iti epekto ti panagbalbaliw ti klima (kas kadagiti plantasyon ti kawayan).

Maag-agawan met ti pagbiagan ti babassit a mangngalap ken marinero iti panagserrek ti dadakkel a komersyal a *trawler* wenno barko iti 15-kilometro a *municipal waters*, kaniwas iti intuding ti reaksyunaryo a linteg nga eksklusibo nga usar ti babassit a mangngalap. Mapapaidaman da met ti pagbiagan iti maar-aramid a reklamasyon ti daga, ken nu agiyar-aramid ti US ken AFP ti mano nga aldaw wenno lawas nga ehersisyo militar kadagiti igid-baybay. Sumangsango da met iti pangta ti panangitakder kadagiti "coastal wind energy projects." Bakbaklayen da met ti dagsen ti liberalisasyon iti importasyon ti ikan, nangato a gastos iti panagkalap ken interes iti pautang.

Mapadpadasan iti intero a pagilyan ti nakaro nga epekto ti panagbaliw ti klima. Gapu daytoy iti pannakadadael ti bantay ken karyan a manon a dekada a kamkamamen dagiti gamrud a gangannaet a kapitalista ken dagiti kakunsabos da a lokal nga agar-ari a dasig. Saan a marukod ti panagsagaba ti masa nga anakling-et iti sango ti napipigsa a panaglayus ken panagreggaay ti daga, nga agresresulta iti pannakadadael dagiti mula ken pagtatau-

dan ti pagbiagan, pannakadadael dagiti pagtaengan ken pannakatay ti adu a tao.

Tapno mapagtalinaed ti medyo nanam-ay a biag, agmalmalem met nga agrabtrabaho dagiti manursuro, ordinaryo nga empleyado, babassit a propesyunal, dagiti agtagikwa ti lugan a pangpasada, babassit a tersena wenno pwesto iti palengke, dagiti addaan kasanayan kas *freelancer* wenno *gig worker*, dagiti *call-center agent* ken dadduma pay a sektor a mangbukbukel ti dasig a petiburges. Iti tengnga ti nakaro a krisis iti gimong, ti mayoria kadakwada ket saanen a nakaurnong tapno maaddaan ti bukod a balay wenno makapadakkel iti kapital ken napasas a matentennag iti kasasaad ti biag ti adu a masa nga anakling-et. Minilyon a kabataan ti saanen a makaturpos ti panagadal iti kolehiyo gapu iti kinangato ti babayadan ken paggastusan.

Langit ken daga ti baet ti biag ti masa ti umili a Pilipino ken ti sumagmamano nga agar-ari a dasig. Bayat nga agsusuwek ti biag ti masa a Pilipino, dumakdakkel met a dumakdakkel ti kamkamamen a kinabaknang ti dadakkel a burgesya kumprador, apo't daga ken burukrata kapitalista. Manipud idi nagtugaw ni Marcos, ti pinagtipon a sanikwa ti tallo a kabaknangan iti Pilipinas—da Enrique Razon, Manuel Villar ken Ramong Ang—ket dimmakel ti 56% manipud ₱485.6 bilyon agturong ₱1.3 trilyon. Kabayatan na, iti 50 a kabaknangan ket dimmakel ti 25% manipud ₱979 bilyon agturong ₱4.9 trilyon. Adayo daytoy iti naited a 7.5% a pananggato iti sweldo dagiti mangmangged iti National Capital Region tatta a tawen.

Bayat a nailumlom iti kinarigat ti masa nga anakling-et, agbibbiag a nabarayuboy dagiti agar-ari a dasig. Busbusosen da ti kinabaknang kadagiti mansyon, agkakangina a lugan, pribado a resort ken dagiti yate, balitok a relo ken alahas, panagkasino ken agsubli-subli a byahe iti sabali a pagilyan, usar dagiti bukod da nga eroplano.

Agkamkamkam da ti higante a kinabaknang iti pannakisosyo kada-giti gangannaet a dadakkel a kapitalista ken bangko, kas ahente iti panagiluwas kadagiti naata a materyales (dagit mineral, prutas, kopra, gameng ti baybay, goma), panagangkat kadagiti nalpas a tagilako ken ramit, ken kas manedyer dagiti gangannaet nga agpupuonan kadagiti kumpanya a manggungundaway iti nalaka a pigsa't tegged ti asembliya para iti panag-eksport. Isuda dagiti adda iti likod ti panagagaw ti daga ken panangisapribado ken panagnegosyo kadagiti serbisyo publiko kas ti kuryente, datum, telekomunikasyon ken transportasyon. Iggem da dagiti kadakkelan a bangko, dagiti kumpanya ken konglomereyt kabilang ti International Container Terminal Services (ICTS), SM Investments, BDO, SM Prime, Meralco, BPI, San Miguel Corporation, Ayala Land, PLDT, China Bank ken dadduma pay a dadakkel a korporasyon. Isuda ti mangponpondo ken sumupsuporta kadagiti kadakkelan a partido pulitikal ken agnumnumar iti pabor ti gubyrno kadagiti kontrata, linteg, proyekto a pang-imprastruktura ken dagiti desisyon ti korte.

Ti agar-ari a dasig ket kabinna-dang ti imperyalismo a US iti panagtalinaed ti pagilyan nga atrasado. Awan ti interes da nga ipundar dagiti basaran nga industriya ken padur-asen ti agrikultura wenno itandudo ti agwaywayas nga ekonomya. Agak-akup da ti kinabaknang manipud iti kinaatrasado ti pagilyan.

Ti agar-ari a dasig ket kangrunaan nga ibagbagi tatta ti napeklan nga aso-aso a rehimen Marcos. Imatmatonan na ti estado a neokolonial, a ti kangrunaan nga adigi na ket ti Armed Forces of the Philippines (AFP) a konkontrolen ti imperyalismo a US. Iti sango ti uming-inget a panagribal da iti China iti napalabas a dekada, ad-adda a papairuten ti imperyalismo a US ti kontrol na iti Pilipinas. Pimmigsa ti pannakibiang ti militar ti US babaen ti dumakdakkkel a Balikatan exercises, a

maiyar-aramid iti sidong ti Mutual Defense Treaty, Visiting Forces Agreement, Enhanced Defense Cooperation Agreement (EDCA) ken dadduma pay a saan a patas a katulagan a militar ti US ken Pilipinas.

Iti sidong ni Marcos, tuloy-tuloy a dumakdakkkel ti presensya dagiti tropa, luglukan ken ramit a panggubat ti US iti Pilipinas. Linuktan ti US dagiti nayon nga EDCA site tapno agserbi nga istasyon dagiti tropa ken tagabalakad a militar ti US ken imbakan dagiti misayl ken dadduma pay nga armas ti US. Kasilpo daytoy ti dumakdakkkel presensya a militar ti US iti rehiyon ti Asia kasabwat dagiti aso-aso a gubyrno iti Japan ken South Korea. Agtutuon dagiti ehersisyo a panggubat ken panagmaniobra dagiti pwersa a militar ti US. Gungundawayan ti imperyalismo a US ti susik ti Pilipinas ken China iti South China Sea tapno mangsugsog ti armado a risiris. Ar-aramaten daytoy ti napeklan a maka-US a grupo nga Akbayan kas sibilyan a mangsugsugsog ti gera wenno mangrubrubrob ti Sinophobia wenno sentimyento a kontra-China tapno iladawan ti US a "kadwa" wenno "salaknib" ti soberanya ti Pilipinas.

Iladladawan dagiti upisyal ti gubyrno a US nga adda iti "hyperdrive" wenno nakangatngato a tukad ti "kooperasyon" ti US ken Pilipinas, iti sango ti awan kapada a pannakibiang militar daytoy iti pagilyan. Intakder itay nabiit ti US ti Task Force Philippines tapno ad-adda a pairuten ti kontrol iti AFP ken mas epektibo nga usaren daytoy kadagiti operasyon militar ti US iti Pilipinas. Kasaruno daytoy, pinasingkedan ti Konggreso ti US ti Philippine Enhanced Resilience Act wenno PERA a mangilatang iti Pilipinas ti dumanon iti \$500 milyon a tinawen a Foreign Military Financing wenno kabuklan a \$2.5 bilyon iti 2026-2030. Daytoy ket nasurok sangapulo a daras ti kadawyan a mailatlatang nga ayuda a militar iti pagilyan.

Ti neokolonyal nga estado ket nailumlun iti krisis iti pulitika iti sango ti nakaro a binnusor ti agkaka-

ribal a bunggoy ti agar-ari a dasig, ken ti pannakaisina iti umili ti pasista ken mabigbig iti korapsyon a rehimen Marcos. Limmatak iti napalabas a tawen ti panangipalubos ni Marcos iti panangtiliw ken panangibalud iti dati a tiraniko a presidente a ni Rodrigo Duterte kadagiti pasilidad ti International Criminal Court idia The Netherlands gapu kadagiti kaso ti krimen laban iti sangkatawan kanaig ti nasaknap a pammapatay iti ubbaw a "war on drugs." Nagbalin met a nabara ti rinnikyar iti napaay nga *impeachment* ken Sara Duterte nga induron ti nalawa nga intar dagiti pwersa a progresibo, katinnulong dagiti karibal dagiti Duterte iti konggreso. Ngem iti amak nga isuna ti sumaruno, inpasardeng mismo ni Marcos ti panagdengngeg iti Senado a kasabwat dagiti kaalyado ni Duterte.

Napasamak ti maysa kadagiti kabulokan a reaksyunaryo nga eleksyon idi Mayo, nu sadinno a nagbalin a garapalan ti panagsaur, panaglayus ti kinukarot a kwarta tapno igatang ti botos, ipakat ti ranggas ken pangpulitika nga akomodasyon nga inareglo dagiti opereytor ti US. Sarming daytoy ti bulok nga agar-ari a sistema a pangpulitika. Iti sabali a bangir, nagbalin a napatag ti partisipasyon dagiti progresibo ken patriyotiko a partido iti eleksyon, uray pay pinutirya isuda ti panaglipit dagiti armado a pwersa ti estado. Naisangsangayan dagiti kandidato da iti nairut a panangawit kadagiti arungaing ti masa, iti panangibunannag iti bulok nga eleksyon ken panangitandudo iti nailyan ken demokratiko a tarigagay ti umili.

Iti tengnga ti nakaro a krisis iti ekonomya ken panagsuwak ti pagbiagan ti nalawa a masa ti umili, bintak ti nasaknap a pungtot iti korapsyon ken panagtakaw iti pondo ti umili. Naiparang kadagiti publiko nga imbestigasyon ti higante a pondo ti umili a tinakaw dagiti burukrata kapitalista iti naanomalya ken palpak a proyekto a *flood-control*, ken panangibulsa ti ginasut a bilyon

a piso a kikkab dagiti upisyal ti Department of Public Works and Highways (DPWH), dagiti kongresman, senador, ken nangangato nga upisyal ti Malacañang.

Manipud Setyembre, mano a bulan a nagdalluyon ti tignay protesta a kontra-korapsyon, iti panangiyuna dagiti kabataan estudyante, ti kadawyan a maaw-awagan a Generation Z wenno Gen-Z, kas kadagiti protesta iti sabali a pagilyan. Ngem saan a kas ti apagbiit a rissik ti protesta iti sabali a pagilyan, nagtuluytuloy ti protesta dagiti kabataan estudyante iti Pilipinas, a pinayungan dagiti nailyan-demokratiko a pwersa. Nakitipon ken nangadaw daytoy ti pigsa iti panagtignay ti nadumaduma a demokratiko a sektor.

Iti sango dagiti protesta, inbunannag ti dati a kasapakat ni Marcos a kongresman a mismo nga isuna ket immawat ti ₱25 bilyon nga “SOP,” ken isuna mismo ti utek iti likod ti panagserrek ti naanomalya a proyekto iti badyet ti gubyrno na. Tapno isalakan ti bagbagi na, napwersa ni Marcos nga isakripisyo dagiti asideg nga upisyal na a napanganan a karaman iti panagtakaw, a nangparnuay ti lamma ken nangpakaro iti susik iti baet ti agbibinnusor a bunggoy iti uneg ti Malacañang. Babaen ti pabuya nga imbestigasyon nga inmandar ni Marcos, pilot a makalkaluban ti direkta a sungsubatan na iti korapsyon kadagiti proyekto a *flood-control* a napondoan iti mismo a mandar na iti sidong ti “unprogrammed appropriations.”

Iti panagayus ti tignay protesta a nabukel dagiti nalawa nga alyansa a kontra-korapsyon iti intero a pagilyan. Pimmigsa ti pukkaw dagiti progresibo ken demokratiko a grupo, nangruna dagiti kabataan, para iti panangpaikkat wenno panangpadisi ken Marcos ken Duterte, uray pay ginandat ti agpampamarang a progresibo a grupo nga Akbayan nga iyaw-awan ti pungtot ti umili ken Marcos. Maisaksakad ti gakat nga itakder ti maysa a “national transition council” a sumukat iti gubyrno a Marcos-Duterte, iduron ti panangisi-

gurado kadagiti addang tapno pagsubbaten dagiti karaman iti korapsyon, ken tungpalen dagiti panagbalbaliw iti sistema ti eleksyon ken gubyrno. Numan pay daytoy ket adda pay latta iti balangkas iti agdama a sistema, ken saan a mangitunda ti pundamental a panagbalbaliw iti sistema, ti kastoy a panawagan ket pudno a sarming ti nauneg a panna-kadismaya ken kinaawan talek ti umili iti reaksyunaryo a sistema ken kadagiti agar-ari a dasig, iti sango ti agsubli-subli a kaso ti korapsyon kadagiti napalabas a dekada.

Tapno lapdan ti panagdakkel dagiti tignay protesta iti kalsada, inaramat ni Marcos dagiti pwersa ti pulis ken militar iti panangpawil iti demokratiko a karbengan. Idi Setyembre 21, iti maika-53 anibersaryo ti linteg militar, nasurok 270 ti naaresto idiy Mendiola iti bimtak a kumprontasyon iti baet dagiti pulis ken dagiti kabataan a natured a limmaban. Iti rali idi Nobyembre 30, arig na garison ti Malacañang a pinalikmutan ti rinibo a pulis tapno saan a makaasideg ti umili iti Malacañang ken saan a mangngeg ni Marcos ti pukkaw da.

Dagiti napasamak a represyon kadagiti rali ket maysa laeng a paset ti kumarkaro a pasista a represyon ti rehimen Marcos. Inruar ni Marcos tatta a tawen ti National Action Plan for Unity, Peace and Development (NAP-UPD) nga agserberbi tatta a plano iti nasaknap a represyon kadagiti demokratiko a karbengan iti balangkas ti *counter-insurgency*. Ar-aramaten daytoy ti Anti-Terror Law ken Anti-Financing Terrorism Law tapno ipiten dagiti timpuyog ti masa ken dagiti organisasyon ti sibilyan a kagimongan, isilpo dagitoy iti rebolusyonaryo a tignay ken pawilan ti aktibidad da.

Iti kasyudadan, iyar-aramid dagiti ahente ti estado ti sarbeylans, panaglipit ken pammutbuteng tapno lapdan ti panagunyon dagiti mangmanged ken panagorganisa dagiti kabataan ken dadduma pay a sektor. Dagiti mabigbig a lider wenno nakipaset kadagiti tignay protesta

ket target ti “panagbisita iti balay” dagiti pulis tapno “kumbinsiren” isuda a tumiwalag kadagiti organisasyon da ken saan a dumar-ay kadagiti tignay. Agsusumbangir ti panagipila ti pinarbo a kaskaso, kabilang ti pangta a panangidarum ti pulis iti nasurok 90 a lider-kabataan ken dagiti dimmar-ay iti rali idi Setyembre 21 idiy Mendiola.

Iti met laeng balangkas ti NAP-UPD, agtultuloy nga ipatpataw ti AFP, kasabwat ti NTF-Elcac, ti *de facto* a linteg militar iti ginasut a barangay iti intero a pagilyan. Maipatpatungpal dagiti addang a represibo ken mangidadanes iti masa a manalon, kabilang ti panangikeddeng ti limitado nga oras ti panagtrabaho dagiti manalon iti talon da, panagpapirma iti *logbook* iti panagruar wenno panagserrek iti baryo, panangikeddeng ti limitado a kinaadu ti bagas a mabalin a gatangen, panagipataw ti karpyu ken dadduma pay a patakaran ti panangkontrol iti garaw ti bumaranggal. Maipakpakat dagiti pangkat dagiti soldado kadagiti barangay wenno ummong dagiti baryo dagiti manalon, nangruna dagiti pagat-atapan ti AFP a sumupsuporta iti rebolusyonaryo a tignay, iti nagan ti panangpawil iti panagsuporta iti New People’s Army (NPA).

Ti imperyalismo a US ti kangrunaan a tagabalakad ken para-ited ti suporta iti pinansya ken materyal iti operasyon a kontra-insurhensya ni Marcos ken ti AFP. Awan ressat ti ti panagdakiwas ti AFP kadagiti baryo ken kadagiti operasyon laban iti NPA. Agtultuloy dagiti *triad* wenno nagkatlo nga operasyon a saywar, intelidyens ken kombatan iti desperado a gandat a rebbeken ti hukbo ti umili wenno lapdan dagiti pwersa a gerilya nga agipatungpal ti gawaing masa kadagiti baryo. Kadagiti lugar nga adda iti sidong ti *focused military operation* dagiti dibisyon ken area command ti AFP, maiyar-aramid dagiti nasaknap nga operasyon kadagiti agkakabangibang a patyen daytoy a sona a gerilya ti NPA. Bata-batalyon ti ar-aramaten ti AFP tapno kamaten

dagiti gerilya a platun wenno iskwad ti hukbo ti umili. Kagiddan daytoy ket maar-aramat ti iskema nga amnestiya para iti saywar. Manipud 2023, inaramat ni Marcos ken dagiti panakabagi na ti sikreto a pannakisari-ta iti NDFP iti gandat a mapalab-o-gan daytoy iti saritaan iti panagsu-render ti rebolusyonaryo a tignay.

Agiwarwaras met daytoy kada-giti iskwad wenno pangkat dagiti pasista a soldado, a nu dadduma ket agpampammarang a pwersa a gerilya iti gandat nga allilawen ti masa. Agus-usar met ti AFP kadagiti dakes nga elemento iti baryo tapno ipuslit dagiti ramit nga elektroniko (GPS tracker) iti pwesto dagiti yunit gerilya, tapno puntiryaen dagiti Nalab-baga a mannakigubat ti panagkan-yon, istraping ken panagbomba ma-nipud iti ere usar dagiti FA-50 *jet fighter* wenno Super Tucano a pang-atake nga eroplano.

Sadinnoman ken kaanoman nga iyar-aramid ti AFP kadagiti opera-syon a kontra-gerilya, karaman iti target daytoy dagiti masa a manna-lon iti baryo. Tunggal adda ti armado nga engkwentro, pwersaan a mapap-papanaw ti masa kadagiti baryo kas panangdusa iti bumaryo a patyen da-giti pasista nga upisyal ti AFP a su-

mupsuporta iti NPA. Iti napalabas a tawen, nasurok 7,600 a mannalon ti biktima ti inkapilitan a panagbakwit.

Isuda ket paset ti kabuklan a dandani 240,000 a nagbalin a bikti-ma ti pasista a represyon ti rehimen US-Marcos manipud Disyembre 2024. Kabilang ditoy ti 40 a biktima ti pammapatay, 34 ti iligal a panag-dukot ken nasurok 300 ti panag-tortyur. Kangrunaan a target ti pa-sista a rehimen US-Marcos dagiti grupo wenno pwersa nga aktibo iti panangsalaknib iti karbengan ti ma-sa a mannalon ken mangmangged ken dagiti mangiyab-abante ti nail-yan demokratiko a tarigagay ti umili.

Kaniwas iti katulagan ti reak-syunaryo a gubyrno kadagiti pwer-sa a Moro a mangbigbigbig iti ag-waywayas a gubyrno iti Bangsa-moro Autonomous Region of Muslim Mindanao, agtultuloy a pakibibia-ngan ni Marcos ken ipatpataw na ti turay na kadagiti pang-uneg a paka-seknan ti Bangsamoro Transition Authority, a manon a daras a na-tantan ti panangangay ti eleksyon da. Agpegpeggad tatta ti katulagan pangkapyia iti sango ti pannakapaay ni Marcos a tungpalen dagiti obliga-syon ti gubyrno ti Manila iti laksid ti panangisuko ti armas ti mano ribo

a pwersa ti Bangsamoro Islamic Freedom Fighter ti Moro Islamic Li-beration Front. Agtultuloy ti rekla-mo ti masa a Moro ti panagabusu dagiti pasista a pwersa ti AFP iti karbengan da.

Kas ti paulit-ulit a naipakita iti pakasaritaan, awan ti anyaman a ki-napigsa ti pasista a represyon ti ma-kalapped iti panagbangon ti umili. Kinapudno na, bayat a kumarkaro ken lumawlaw ti represyon, ad-ad-da a pumigpigs ti panagtarigagay ti umili nga agdependa ken lumaban.

Iti sango ti umun-uneg a krisis ti malakolonyal ken malapyudal a sis-tema iti Pilipinas, ken ti kagiddan daytoy a panagkaro ti panagsagaba ken panagrigrigat ti umili, ket ma-parparnuay ti nakasaysayaat a ka-sasaad para iti panagabante ti de-mokratiko a rebolusyon ti umili. Ka-sapulan a gammatan ti Partido ti gundaway tapno ad-adda nga agpa-lawa ken agpatibker iti balangkas ti panangkumpleto ken panangpauneg iti tignay panagilinteg. Kabadang ti amin a rebolusyonaryo a pwersa, nasken nga ad-adda pay nga agpa-kalaing iti gawaing masa tapno ri-i-ngen, organisaen ken patignayen ti minilyon nga umili iti dana ti rebolu-syonaryo a dangadang.

III. Kasasaad ken dagiti rebbengen tapno ad-adda a papigsaen ti Partido ken rebolusyonaryo a tignay

Iti duron ken tarabay ti tignay panagilinteg iti napalabas a dua a tawen, agtultuloy nga agpappapigsa ti Partido iti ideolohiya, pulitika ken organi-sasyon iti amin a benneg. Naan-anay ti determinasyon dagiti kadre iti amin a tukad ti Partido a tudwen, dillawen ken rimbawan dagiti nagkapuyan ken nag-kamalian iti napalabas ken itunda iti baro tukad ti rebolusyonaryo a praktika.

Nalawag la unay nga ipakpakita ti nakaro a krisis ti malakolonyal ken malapyudal a sistema iti pagilyan ken ti sangalubongan a sistema a kapitalista nga agtaltalinaed nga usto, naikalinteg ken nairut ti pagkasapulan nga iyabante ti de-mokratiko a rebolusyon ti umili iti Pilipinas. Daytoy laeng ti pamuspu-san tapno naan-anay a rumuk-at ti umili a Pilipino iti panangidadanes ti imperyalismo, pyudalismo ken bu-rukrata kapitalismo ken ipundar ti

narimat a sosyalista a masakbayan.

Manipud kadagiti napadas a pa-nagsanud ken dangran ti Partido ken rebolusyonaryo a tignay, nagun-od tayo iti napalabas a tawen dagiti apag-isu a panagabante iti naduma-duma a tay-ak ti rebolusyonaryo a trabaho, uray pay adda ti sumagma-mano a paset ti maud-udi, ken adda ti mano a nagsagrap ti dangran gubway dagiti saan pay a naan-anay a nailininteg a pagkapuyan ken iti sango ti narungsot nga atake ti ka-

busor.

Kabadang ti amin a rebolusyo-naryo a pwersa, ad-adda pay nga agpappapigsa ti Partido tapno ma-ngidaulo iti panangiyabante iti de-mokratiko a rebolusyon ti umili ba-ben ti naunday a gubat ti umili. Na-sayaat a nakapwesto tatta ti Partido tapno idaulwan ti nalawa a masa ti umili iti amin a tay-ak ti dangadang, nangruna iti tay-ak ti armado a da-ngadang.

Ad-adda a pinatibker tayo ti pang-ideolohiya a pundasyon ti Par-tido manipud idi rinugyan tayo ti tig-nay panagadal iti Marxismo-Leninis-mo-Maoismo ken kadagiti basaran a prinsipyo ti Partido idi 2023. Pang-gep ti tignay panagadal nga iwaksi,

kangrunaan ti empirismo, sekundaryo ti dogmatismo iti ideolohiya; iwaksi ti konserbatismo, liberalismo, buntotismo ken sektoralismo, iti pulitika; ken ti burukratismo ken ultrademokrasya iti organisasyon. Babaen ti panagdillaw ken panagdillaw-iti-bagi, kagiddan ti panagilinteg ket ad-adda a mapappapigsa ti panagkaykaysa dagiti kadre ken komite ti Partido.

Iti panangiyuna ti Komite Sentral, ad-adda a mapapauneg ti tignay panagilinteg babaen ti panaglagom kadagiti kapadasan tayo. Umad-adaw tayo kadagiti adal iti maikadwa a naindakan a tignay panagilinteg, kagiddan ti panagsubli tayo iti pakasaritaan ti panangitakder ken panaglawa ti Partido manipud idi naitakder daytoy 57 a tawenen ti napalabas.

Agtultuloy a pappapigsaen ken padpadur-asen dagiti kadre ken komite ti Partido ti panagsukisok iti gimong ken panagamiris iti dasig (SICA wenno *social investigation and class analysis*) iti saklaw dagiti panangidaulo da. Panggep ti panagbukel ken panagpauneg kadagiti SICA a tudwen dagiti kangrunaan a parikut ken dagiti isyu a sangsangwen ti nalawa a masa, nangruna dagiti langa ti panangidadanes ken panaggundaway kadagiti basaran a dasig ken sektor, ken dagiti umanatop a pamuspusan wenno taktika tapno iyaramid ti nasaknap a panagriing, panagorganisa ken panagpatignay kadakwada. Babaen laeng ti panangiyaramid ti SICA a mabukel ti usto a plano ken panawagan a sigurado nga arakupen ti masa ken mangparegta iti dangadang da.

Kas sungbat iti panawagan ti Partido, tuluy-tuloy a mapalpalawa ken maparparegta dagiti rebolusyonaryo nga organisasyon ti masa dagiti mangmanged, mannalon, kabataan, babbai, manursuro, artista, mangmanged iti salun-at, tao't simbaan, syentista, abugado, katu-tubo nga umili, migrante iti ruar ti pagilyan ken dadduma pay. Babaen kadagiti rali ken nadumaduma a langa ti panagpropaganda, pappapig-

saen da ti panawagan nga iyabante ken makipaset iti gubat ti umili.

Ur-urnongen ken konkonsolidan da ti abante a paset ti masa a makipaspaset iti dangadang ti masa. Agserserbi da a duri ti nalawa a naparang a tignay masa a tumartarabay tapno saan a maiyaw-awan ti masa iti repormismo iti dangadang da. Iti kasyudadan, pumigpigs ti panawagan para iti panagpailista nangruna manipud iti intar dagiti petiburges nga intelektwal, tapno agturong iti kaaw-awayan para iti temporaryo wenno pangmabayagan a *deployment*. Saan a mabaloran ti agbalbalin a kontribusyon da iti panangparegta iti trabaho iti edukasyon, pangkultura ken dadduma pay nga aspeto ti trabaho iti hukbo ti umili.

Umannurot iti patakaran ti nangregta a panagpalawa nga awan ti maiserrek nga uray maysa a saan a mapagpiaran, natibker a palpalawen tayo ti intar ti Partido babaen ti panagrekut manipud kadagiti baro a tumataud a rebolusyonaryo iti tignay masa. Maar-aramid daytoy gapu ta dagiti kadre ken kameng ti Partido ket adda iti bugas dagiti dangadang ti masa ken kadwa ti masa kadagiti panagtignay da. Nakawaras da iti intero a pagilyan.

Bukbuklen tayo dagiti sangay ti Partido bilang basaran nga organisasyon daytoy, sadinno man nga adda ti saan a bumaba iti tallo a kameng. Ti panagpaadu ken panagpapis sa kadagiti sangay ti pagrukodan ti kinalawa ken kinauneg ti panagramut ti Partido iti masa, ken ti kabaelan daytoy nga idaulwan ti masa iti rebolusyonaryo a dana. Dagiti sangay ti Partido ti bugas ken taliba dagiti rebolusyonaryo nga organisasyon ti masa ken dagiti nailyan ken demokratiko a dangadang da.

Iti kasyudadan, itaktakder tayo dagiti sangay kadagiti pabrika ken lugar a pagtrabahuan, kadagiti nakurapay a komunidad, kadagiti pagadalan, upisina ken dadduma pay a lugar. Iti kaaw-awayan, bukbuklen tayo dagiti sangay ti Partido kadagiti baryo wenno ragup dagiti baryo.

Kadagiti lugar a naduprak iti sango ti represyon ti kabusor wenno dadduma pay a makagapu, maipingpinget a balbaliw nga itakder dagitoy.

Partikular iti kaaw-awayan, ti panangitakder kadagiti sangay ken komite ti Partido ti tulbek tapno idaulwan ti nalawa a masa iti dangadang da para iti reporma iti daga, ken iti armado a dangadang. Iti panangidaulo ti Partido, maitaktakder dagiti Komite a Rebolusyonaryo iti Baryo, wenno organo ti bileg iti pulitika nga isu ti nagkaykaysa a prente iti baryo, iti pundasyon dagiti basaran a timpuyog ti masa a mannalon, kabataan, babbai ken ubbing, ken dagiti mangmanged iti kultura, karaman ti rebolusyonaryo a timpuyog dagiti makintengnga a pwersa iti baryo. Nayon ditoy, bukbuklen ti Partido ti alyansa iti baet dagiti bumaryo, iti masa ken makintengnga a pwersa kadagiti sentro ti ili.

Ar-armasan ti Partido ti masa. Bukbuklen ken patpatignayen tayo dagiti yunit ti milisyang bayan bilang pormasyon ti New People's Army kabadang dagiti kwerpo a pangdependa-iti-bagi dagiti timpuyog ti masa, tapno iyabante ti nasaknap a panna-kigubat a gerilya. Nu sadinno man a nabukel da, dagiti yunit ti milisyang bayan ket tumultulong iti panagpapis sa kadagiti pultaym a yunit ti hukbo nu sadinno a nakatakder dagitoy, ken nu sadinno nga awan pay, agin-inisyatiba da nga itakder dagiti baro a yunit gerilya ti hukbo ti umili. Nu sadinno a mabalin a buklen, palawaen ken papis saen dagiti pwersa a gerilya ti NPA, itaktakder ti Partido dagiti sona ken larangan gerilya a pangiruswatan ti armado a dangadang para iti paset-paset a panangrebbek iti kabusor.

Iti tarabay ken inspirasyon ti tignay panagilinteg, agtultuloy a pa-paayen ti Partido ti awan-sarday a terorista a gera ken saywar ti imperyalismo a US ken pasista a rehimen Marcos, iti deklarado a gagem daytoy a rebbeken ti Partido, ti New People's Army ken intero a rebolusyonaryo a tignay. Ti Partido ket saan a maatiw gapu ta saan nga ag-

kupas ti kinapudno na iti proletaryo nga ideolohiya, prinsipyo ken sagu-dayen ken ti pinanday iti apoy a pangngeddeng a pagserbian ti umili.

Tuluy-tuloy a papaayen ti NPA dagiti “nakapokus nga operasyon militar” ti AFP babaen ti panangipaidam ditoy ti pokus wenno target. Adda pay sumagmamano a nadangran, a masansan ket gubway ti internal a pagkapuyan. Ti tuluy-tuloy a panagpinget ti NPA iti nadumaduma a rehiyon ket dakkel a tungpa iti pasista a ni Marcos a silalastog a nagdeklara idi Hulyo nga “awanen ti grupo a gerilya” iti pagilyan.

Iggem dagiti adal ti tignay panagilinteg, maipatpatungpal dagiti panagisimpa iti organisasyon ken kumand ti hukbo ti umili tapno masaklaw ken makatignay da iti nalawlaw nga erya, ken napasaspas ken nalimlimed a makaakar-akar da. Iti kabuklan, napagtalinaed a tuleng ken bulag ti kabusor, mas malikliklikan dagiti labanan a depensiba, napreserba ti pigsa ken in-inot a balbaliw a nakapagpalawa ti NPA. Nabawi wenno nasubliyan daytoy dagiti dati a base na, bayat a makapalpalawa kadagiti baro nga erya. Iti determinasyon a lumaban ken aktibo a panagdependa, masangsangga ken maat-atiw ti NPA dagiti atake ti kabusor. Pakakitaan ti panagbawi, adda ti sumagmamano a yunit a nakairuswat ti babassit a taktikal nga opensiba. Adda dagiti yunit nga ab-abante ti kapadasan da iti panagilinteg ken balbaliw a panagpapigsa, bayat nga ad-adu ti kumamkamakam ken adda pay ti sumagmamano a maud-udi.

Ti nairut a silpo ken nauneg a panagramut ti NPA ti tulbek iti amin kadagitoy, kasta met ti panagannatup dagiti organisasyon ken dagiti gerilya a taktika. Tapno maaramid daytoy, parparegtaen dagiti Nalab-baga a mannakigubat ti panagtulong iti masa iti produksyon, panangited iti serbisyo iti salun-at ken edukasyon ken panagpapigsa iti trabaho a pangkultura. Tumultulong ti NPA iti panangbukel ken panangpauneg iti SICA, panangkaykaysa iti masa

ken panangingato iti pangngeddeng da a salakniban ken ilaban ti pagimbagan da.

Agtultuloy met a lablabanan ti NPA ken dagiti rebolusyonaryo a pwersa ti awan ressat nga operasyon nga intelidyens, saywar ken panagpasurrender ti kabusor iti lingged ti “lokalisado a saritaan pangkapyia.” Napinget nga ibunbunannag tayo nga awan ti kaes-eskan ti inkari ti AFP ken NTF-Elcac a “nasayaat a biag” kangrunaan gapu ta saan daytoy a risrisuten ti basaran a parikut ti kinaawan ti daga, ken nangruna, gapu ta bin-ig nga inuulbod dagiti maipanpannakkel a programa ti “reintegrasyon.” Maibunbunannag met dagiti natatek iti korapsyon ken ubbaw a “proyekto para iti panagdur-as” nga imprastruktura a mabukbukbukan ti binilyon a piso, nga ibulbursa dagiti upisyal militar ken kasabwat a kontraktor. Napatpateg pay, maibunbunannag a ti pudno a panggep ti maikarkari a “kapyia” ket ti panangipawil iti masa tapno nawaya a makastrek dagiti gangannaet a kapitalista ken dagiti kakunsabos da a managkamkam ti daga ken natural a kinabaknang.

Kadagiti napalabas a tawen, pudno nga adda sumagmamano nga elemento a nagtraydor iti Partido ken nangisagmak iti masa. Palalo da tattan a maisinsina iti ken bin-ig a kagurgura ti masa. Adu kadakwada ket inbasura ken binaybay-anen ti kabusor kalpasan a maawanan dan iti serbi iti saywar. Dagiti kadakesan a nagbalin a kriminal nga aset ti kabusor ket ipilpilaan ti kaso ti korte ti umili ken mapatpatawan ti umiso a pannusa a dawdawaten ti masa, kabatog ti basol a naaramid da.

Ti dakkel a mayorya a 99% iti kameng ti Partido ken dagiti rebolusyonaryo nga organisasyon ti masa, ket agtaltalinaed a napudno kadagiti prinsipyo ken sagudayen ti Partido. Adda dagiti napasibo gapu iti naininget a pasista a represyon. Ngem nalaka da a balbaliw a maur-urnong kalpasan a malawagan kadagiti rebbengen a kasapulan nga akemen.

Babaen ti takder para iti nainkalintegan ken mataginayon a kapyia, agtultuloy met a papaayen ti Partido dagiti gandat ti rehimen US-Marcos a palab-ogan ti National Democratic Front babaen ti panangisuko iti armado a rebolusyon. Iti napalabas a dua a tawen, awan ti nagbalin a signipikante panagdur-as kadagiti panagsasarita dagiti mangibagi ti NDF ken ti Guberno ti Republika ti Pilipinas (GRP) tapno balbaliw a biagen ti pormal a saritaan iti kapyia.

Kangrunaan a makagapu iti panagsardeng ti saritaan iti kapyia ket ti panagpilpilit ni Marcos nga ibasura ti amin a nabukel a katulagan iti napalabas a nasurok 30 tawen ti negosasyon ti NDFP-GRP, kabilang ti The Hague Joint Declaration, ti Joint Agreement on Safety and Immunity Guarantees (JASIG), ti Comprehensive Agreement on Respect for Human Rights and International Humanitarian Law ken dadduma pay. Ipakpakita ni Marcos a saan na a kabaelan a takderan ti pirma ti GRP, banag a mangdaddadael iti talek ti NDFP ken umili.

Pilpiliten ni Marcos a “balbaliw a rugyan” ti saritaan iti “demobilisasyon ken panang dis-arma” iti NPA, a saan nga umuna a marisrisut dagiti basaran a parikut ti umili, nga isu ti ramut ti gubat a sibil iti pagilyan. Natibker a timmakder ti delegasyon ti NDFP kontra iti daytoy nga iske-ma. Nu saan a baliwan ti rehimen Marcos ti militarista a takder daytoy iti saritaan, nakasagana dagiti rebolusyonaryo a pwersa nga isuspinde ti pannakisarita iti GRP, agingga a masukatan ni Marcos kadagiti namna-maen a silulukat ti panunot na a risuten dagiti basaran a parikut ti daga ken kinaawan hustisya. Adda man wenno awan ti saritaan pangkapyia iti GRP, sibubukel ti pangngeddeng ti Partido nga iyabante dagiti rebolusyonaryo a dangadang tapno ilaban ti nailyan ken demokratiko a tarigagay ti umili.

Nakasaysayaat ti obhetibo a sitwasyon iti uneg ti pagilyan ken iti intero a lubong tapno iyabante dagiti rebolusyonaryo a dangadang. Ma-

kuna met a nasayaat ti suhetibo a sitwasyon - gapu iti tignay panagilinteg, ti Partido ken amin a rebolusyonaryo a pwera ket adda iti nasaysayaat a saad tatta, kumpara iti napalabas a dua a tawen, tapno gammatan dagiti gundaway tapno idaulwan ti nasaknap a panagabante ti demokratiko a rebolusyon ti umili kadagiti umay a tawen. Nu pay kas-ta, pudno la unay a dadakkel ti sangsangwen tayo a karit ken nadagdagsen ti rebbengen a rumbeng tayo nga ibaklay iti umay a maysa wenno dua a tawen tapno papigsaen ti Partido iti ideolohiya, pulitika ken organisasyon, tapno maingato ti kabaellan daytoy a patignayen ti minilyon nga umili iti dana ti demokratiko a rebolusyon ti umili babaen ti naunday a gubat ti umili.

Iti ideolohiya, kasapulan nga ituloy a paunegen ken palawaen ti tignay panagilinteg iti panagserrek daytoy iti maikatlo a tawen, nga adaan walo a paset wenno aspeto: maysa a Marxista-Leninista-Maoista a kampanya ti panagadal, maysa a kampanya para iti nauneg a panagadal iti konstitusyon ken programa ti Partido, maysa a kampanya a panangrepaso kadagiti dokumento ti Umuna ken Maikadwa a Naindaklan a Tignay Panagilinteg, maysa a kampanya a panaglagom, maysa a kampanya ti panagsukisok iti gimong ken panagamiris iti dasig (SICA), maysa a kampanya ti panagdillaw ken panagdillaw-iti-bagi, maysa a kampanya ti ebalwasyon ken promosyon dagiti kadre ken maysa nga agtultuloy a kampanya tapno siguraduen ti panangipitungpal ti tallo-tukad a kurso iti edukasyon ti Partido.

Kas ti nagbalin a panagtalmeg tayo iti napalabas, ti tignay panagilinteg, kangrunaan, ket maysa a tignay panagadal, tapno ingato ti teoretiko a kaamwan dagiti kadre ken kameng ken pairuten ti panangawat iti linya a pang-ideolohiya, dagiti prinsipyo ken patakaran ti Partido. Daytoy ti tulbek tapno maingato ti rebolusyonaryo a praktika tayo. Nasken a pasayaaten ti wagas ken

istilo ti panagtrabaho tapno mapadakkel ti gungun-oden a target, mapauneg ken mailinteg ti panagpanu-not ken pamuspusan nga agbalbalin a lapped iti dadakkel a panagabante. Agtuloy ti tignay panagilinteg agingga a mapanggeddeng a natudo, naiwaksi ken narimbawan dagiti nagkapuyan ken nagkamalian iti napalabas, ken magun-od tayo ti sigurado a direksyon ti panaglawa ken panagabante.

Nairut la unay ti pagkasapulan nga ikamakam ti panaglagom iti amin a tukad ken tay-ak ti trabaho, nangruna iti napalabas a 20-25 tawen manipud iti panagleppas ti maikadwa a naindaklan a tignay panagilinteg. Ti panaglagom iti daytoy a panawen ti mangited kadatayo ti naun-uneg a panagawat iti istorikal a balangkas dagiti nagkapuyan tayo iti napalabas a tawen. Rebbengen ti Komite Sentral nga idauluan daytoy a panaglagom, kabadang ti amin a komite a pangrehiyon iti intero a pagilyan.

Dawdawaten met iti amin a komite ti Partido nga ipangruna ti panagbukel ti SICA, a nakaturong iti sistematiko a panangitudo iti kagawasan a pakaseknan iti gimong ken ekonomya a sangsangwen ti saklaw ken tukad ti panangidaulo da. Ti panagbukel ti SICA ti tulbek iti panangparegta kadagiti dangadang ti masa tapno ilaban ti interes da. Basar ditoy ket rumbeng a buklen ti plano tapno reppeteng ken patignayen ti nalawa a masa.

Nasken met nga iyaramid dagiti espesyal a teoretiko a panagadal kadagiti nalatak nga isyu a sangsangwen ti umili. Iti sango ti nalatak nga isyu ti korapsyon iti sidong ti rehimen Marcos, rumbeng a nainget a pagadalan ti amin a kameng ti Partido ti burukrata kapitalismo, iti tarabay ti teoretiko nga artikulo nga inruar ti Komite Sentral. Dagiti artikulo iti Rebolusyon ket kasapulan a naanep a pagadalan ti amin a kameng ti Partido.

Iti organisasyon, naregta a palawaen ti Partido a saan a mangpastrek ti uray maysa a saan a ma-

pagpiaran nga elemento. Rekruten kas kandidato a kameng dagiti kabantean nga elemento manipud kadagiti aktibista a masa a saan a bumaba iti edad 18, nakasagana nga awaten ti Marxismo-Leninismo-Maoismo ken ti konstitusyon ken programa ti Partido, ken umannugot a sipipinget a mangipitungpal ti trabaho iti anyaman nga organisasyon ti Partido ken regular nga agbayad ti butaw. Awaten isuda kas naan-anay a kameng kalpasan ti panawen ti kandidatura nga intuding ti konstitusyon.

Kasapulan nga ituloy a konsolidan ken papigsaen ti Partido umannurot iti demokratiko a sentralismo, wenno demokrasya a tartarabayan ti sentral a pangangidaulo ken sentralismo a nakabatay iti demokrasya. Ituloy ti nairut a panangipitungpal kadagiti desisyon ti Komite Sentral ken dagiti mangidaulo a komite ti Partido tapno aggigiddan nga agmartsa paabante.

Papigsaen ti sistema a komite babaen ti panangisigurado ti regular ken sistematiko a panagpulong dagiti komite tapno buklen ti kolektibo a panggeddeng kadagiti sangsangwen a pakaseknan, ken tapno kolektibo nga ibaklay dagiti plano. Buklen dagiti komiteng tagapagpaganap ken kalihiman dagiti mangidadaulo a komite para iti inaldaw-aldaw a panangidaulo ken panangsubaybay kadagiti trabaho. Siguraduen a nairut a masubsubaybayan ti kolektibo dagiti indibidwal iti panangipitungpal kadagiti rebbengen.

Ituloy a papigsaen ti sistema ti regular ken espesyal a panagulat iti nangatngato nga organo ken ti naanep a panangtarabay kadagiti nababbaba a komite. Ituloy a papigsaen ti nadumaduma sistema wenno pamuspusan ti panagpipinnasa ti komunikasyon.

Nairut nga ipitungpal dagiti patakaran iti seguridad kas krusyal a rebbengen iti organisasyon. Nairut nga ipitungpal dagiti patakaran iti panagusar ti kompyuter, gadyet a pang-komunikasyon ken ramit nga elektroniko, sistema ti enkripsyon

ken panagannad kadagiti *computer files*, panagkoda kadagiti rekord ken “panangpugsat iti lastiko” kadagiti *fixed point*, nangruna dagiti napudot ken mangidadaulo a kadre. Kasapul-an a siguraduen dagiti yunit ti NPA ti limed a gerilya a panagtignay, panagusar kadagiti sikreto a ruta, panagrikisa kadagiti gamit nga iser-serrek iti yunit ken panangisuro iti tignay a limed iti masa.

Tudwen ken mulat a sanayen ti maikadwa ken maikatlo nga intar dagiti mangidadaulo a kadre. Rumbeng nga agpakalaing da iti teorya ken iti kumprehensibo a panagawat kadagiti prinsipyo ken patakaran ti Partido. Nasken a sanayen tayo isuda kas propesyunal a rebolusyonaryo nga arakupen da kas tungpal biag a karera ti panagserbi iti Partido ken rebolusyon. Naregta nga ikkan isuda kadagiti baro nga atas ken rebben-gen, ken ikabil kadagiti baro a tayak ti trabaho wenno lugar.

Tungpalen ti patakaran ti “simple a panagbiag, napinget a pannakidangadang.” Nairut nga agtultnog kadagiti naituding a pagrukodan ti panaggastos dagiti komite ken indibidwal. Rumbeng nga ikagumaan ti amin a komite ti Partido nga agsanggir iti bagi. Agpasulpot ti kasapulan a rekursu para iti bukod nga operasyon ken ipan ti amin a kabaellan a mangibingay iti sentral a pondo ti Partido.

Iti pulitika, rumbeng a napinget a papigsaen ti New People’s Army ken paregtaen ti rebolusyonaryo nga armado a dangadang, iyabante ti rebolusyonaryo a tignay masa iti kasayudadan ken kaaw-awayan, palapaden ti nailyan a nagkaykaysa a prente ken parukbosen ti trabaho nga internasyunal.

Ti New People’s Army ti kangrunaan nga organisasyon a nairut nga idaduluan ti Partido. Kasapulan a napinget a papigsaen tayo daytoy tapno iyabante ti rebolusyonaryo nga armado a dangadang kas kangrunaan a langa ti dangadang iti panagabante ti naunday a gubat ti umili.

Adda iti nasayaat a saad tatta ti

hukbo ti umili tapno ad-adda nga agpapigsa. Daytoy ket kalpasan nga isimpa tayo ti organisasyon ken operasyon daytoy a nakaturong a kangrunaan iti panagpauneg ken panagpalawa ti base a masa, tapno tulungan ti masa iti panangiyabante ti dangadang nga anti-pyudal ken anti-pasista ken panangparegta ti panagsuporta da iti armado a dangadang.

Papigsaen ken palawaen ti gawaing masa dagiti yunit ti hukbo ti umili ken tulungan ti masa a paregtaen ken ingato ti tukad ti panaglaban da. Kagiddan daytoy, ingato ti kabaellan ti hukbo ti umili iti panangisayangkat ti pannakigubat a gerilya. Napinget nga ingato ti laing ti hukbo ti umili iti panagaramat ti taktika ti konsentrasyon, dispersal ken panagakar tapno pirmi nga iggeman ti inisyatiba iti militar ken pulitika. Pagtalinaeden a bulag ken tuleng ti kabusor iti presensya ken gunay dagiti yunit gerilya. Labanan ken paayen dagiti operasyon a kombat, saywar ken intelidyens ti kabusor.

Nasken a pagtalinaeden dagiti yunit ti NPA ti nangato a kamulatan da iti pulitika, disiplina a militar ken palaban a pakinakem dagiti Nalab-baga a mannakigubat. Nairut a tungpalen dagiti pagannurotan iti panagkampu, iti pannagna ken iti panangipatungpal iti gawaing masa.

Patignayen tayo dagiti iskward ken platon ti NPA tapno iwaras ti armado a dangadang iti kaaw-awayan, kabadang dagiti yunit ti mili-syang bayan ken dagiti kwerpo a pangdepensa-iti-bagi. Pwersaen ti kabusor a naingpis a bennaten na ti pigsa na tapno mapataud ti ad-adu a gundaway para kadagiti taktikal nga opensiba.

Isayangkat dagiti kabaellan nga ipagballigi a taktikal nga opensiba tapno dusaen dagiti napeklan a pasista a kriminal, dagiti elemento a paramilitar ken dagiti elemento a maar-aramat a nagtraydor iti masa ken kumpiskaren dagiti armas da. Isayangkat ti kasapulan nga armado nga aksyon tapno salakniban ti inte-

res ken pagimbagan ti masa laban kadagiti managkamkam ti daga, dagiti mannibrong ken mangdaddadael iti kalikasan ken dagiti kriminal a burukrata-kapitalista nga agtatakaw ti pondo ti umili.

Rumbeng nga igiddan tayo ti panagabante ti rebolusyonaryo nga armado a dangadang iti panagpalawa ken panangparegta kadagiti dangadang ti masa a mannalon iti kaaw-awayan. Napinget nga iyabante dagiti dangadang nga anti-pyudal ken anti-pasista, a maisilsilpo kadagiti dangadang nga anti-imperyalista. Nasken a papigsaen ti tignay mannalon para iti reporma iti daga, umannurot iti minimum ken maksimum a panggep a naituding iti Rebolusyonaryo a Tarabay para iti Reporma iti Daga (RGRL) ti Partido.

Kasapulan nga iyabante iti kaaw-awayan ti nasaknap a dangadang tapno ibaba ti abang ti daga, punasen ti usura ken ingato ti tangdan dagiti mangmangged-talon. Rumbeng a danunen daytoy a kampanya ti kalawaan a posible a bilang dagiti mannalon. Mabalin nga ipatungpal ti maksimum a programa ti panangiwaras ti daga nu sadinno a kabaellan daytoy a depensaan ti armado a pigsa ken nu sadinno a kabaellan daytoy nga imatonan.

Kagiddan ti dangadang para iti reporma iti daga, nasken nga iyabante dagiti dangadang tapno salakniban ti daga laban ti panagkamkam dagiti gangannaet a dadakkel a kumpanya, kasabwat dagiti apo’t daga ken dadakkel a burgesya kumprador ken laban iti panagsukat ti usar ti daga dagiti katalalonan para iti panagpalawa dagiti minasan, plantasyon, dagiti proyekto nga ekoturismo, real estate, “renewable energy,” dam ken dadduma pay. Dagitoy a patakaran ket mangparparigat iti masa a mannalon ken mangipapaidam kadakwada iti pagbiagan, bayat a dangdangran da ti produksyon a pang-agrikultura ken ti kabaellan ti pagilyan a mangpartuat ti naan-anay a taraon para iti umili.

Kagiddan daytoy, kasapulan nga iyabante ti nasaknap a dangadang

para iti nainkalinteg a presyo ti irik, sibuyas, bawang, nateng ken dadduma pay a produkto ti talon ken pananglaban iti liberalisasyon iti importasyon dagiti a produkto a pang-agrikultura. Nasken a buklen ti nalawa a timpuyog ti masa a mannalon iti nadumaduma a linya ti mula. Rumbeng met nga ituloy nga ibunnannag ken labanan ti ubbaw a reporma iti daga ken dadduma pay a programa ti estado, a mangpapabiit ken mangar-aramid a ligal ti panagkamkam ti daga, kabilang ti programa nga SPLIT ti World Bank ken ti “new emancipation law” ni Marcos.

Iti rebolusyonaryo a tignay masa iti kasyudadan, ikkan tayo ti prayoridad ti ad-adda a panagpapigsa iti panagorganisa ken panagpatignay iti intar ti masa a mangmangged, iti mala-proletaryado ken dagiti kabataan estudyante. Papigsaen ti pangorganisa iti intar dagiti mangmangged nga industriyal iti kadakkelan nga empresa iti nailyan a sentro ti syudad ken dadduma pay a dadakkel a syudad iti nadumaduma a paset ti pagilyan. Kagiddan daytoy, papigsaen ti panagorganisa kadagiti mangmangged ken mala-proletaryado kadagiti nakurapay a komunidad iti syudad. Ad-adda a papigsaen ti panagorganisa kadagiti kabataan estudyante kadagiti mayor a syudad iti intero a pagilyan.

Kasapulan a papigsaen dagiti dangadang a pangsektor, pang-ekonomya ken dagiti lokal a dangadang, kagiddan dagiti dangadang nga anti-imperyalista, anti-burukrata kapitalista ken antipasista ken panagsuporta kadagiti dangadang ti mannalon iti kaaw-awayan. Nasken nga ikagumaan a balbaliw nga ibwel ti tignay protesta laban iti korapsyon iti panagserrek ti baro a tawen tapno pagsungbaten ni Marcos ken Duterte kas ari ken reyna ti korapsyon, ken iyawag ti panagibbat wenno panangpadisi kadakwada.

Ibunnannag ti panagsuporta ti imperyalismo a US iti korap a rehimen Marcos. Kagiddan daytoy, patauden ti nalawa a kampanya a propaganda laban iti dumakdakkal a

presensya dagiti tropa nga Amerikano iti Pilipinas, panangibati kadagiti armas a panggubat, panangitakder ti nayon a base ken pasilidad militar, awan patengga a panagsanay iti gera ken ti ituntunda dagitoy a dumakdakkal a pangta a bumtak a mangguyod iti pagilyan. Ibunnannag ti papel ti US ken dagiti napeklan a maka-US a grupo nga ar-aramaten daytoy iti panangsugsog kadagiti susik iti South China Sea.

Agtultuloy a papigsaen dagiti limed a rebolusyonaryo nga organisasyon ti masa, papigsaen ti propaganda ken panawagan para iti demokratiko a rebolusyon ti umili, iti tengnga ti panagabante ti nalawa a naparang a tignay masa. Allukoyen ti kaadwan a sumuporta wenno mapikaset iti armado a dangadang ken dagiti dangadang ti mannalon iti kaaw-awayan.

Iti panangidaulo ti dasig a mangmangged babaen ti Partido, nasken nga ituloy a papigsaen ti nailyan a nagkaykaysa a prente tapno palawaen ti suporta para iti nailyan ken demokratiko a dangadang ti umili. Rumbeng a pagkaykaysaen ti nalawa nga umili laban iti imperyalismo, pyudalismo ken burukrata kapitalismo. Kasapulan nga itakder daytoy iti natibker a pundasyon ti basaran a rebolusyonaryo nga alyansa ti dasig a mangmangged ken dasig a mannalon, kangrunaan iti kongkreto a langa iti New People’s Army, maysa a hukbo a mannalon nga adda iti sidong ti absoluto a panangidaulo ti dasig a mangmangged, ken dadduma pay a langa ti alyansa wenno panagkaykaysa ti tignay mangmangged manipud iti kasyudadan iti tignay mannalon iti kaaw-awayan.

Iti basaran a rebolusyonaryo nga alyansa a mabukel ti progresibo nga alyansa ti masa nga anakling-et ken ti petiburgesya iti syudad; ken ti nalaplapad a patriyotiko nga alyansa dagiti progresibo a pwersa ken ti nailyan a burgesya. Mabukel met ti Partido dagiti temporaryo nga alyansa kadagiti saan a natibker ken saan a mapagpiaran nga alyado,

masansan iti maysa wenno sumagmamano a paset ti agar-ari a dasig laban iti pinakareaksyunaryo, pinakapasista ken pinakaaso-aso iti imperyalismo a US.

Tulbek iti panangbukel ti nailyan a nagkaykaysa a prente ti kinaadda ti napigsa a basaran a rebolusyonaryo nga alyansa. Nasken a mulat nga agbantay iti Kannawan nga oportunista a tendensya a maguyod wenno matennag iti repormismo wenno legalismo wenno iti “Kannigid” nga oportunista a tendensya nga agserra ti ruangan iti saan a pangnamnamaan wenno saan a natibker a pwersa a makaibingay iti panangiyabante ti nailyan-demokratiko a tignay, iti direkta wenno saan a direkta a pamuspusan.

Iti asideg a masangwanan, kasapulan nga ikagumaan a buklen ti kalapadan a nagkaykaysa a prente laban kada Marcos ken Duterte, a tatta ket agpada a mangibagi iti pinakareaksyunaryo ken pinakapasista a paksyon ti agar-ari a dasig, tapno ipan amin a kabaalan nga isina, labanan ken padisyen ti agar-ari a rehimen.

Iti basaran ti pigsa ti panagtignay ti masa nga anakling-et ken petiburgesya iti syudad iti pananglaban iti rehimen US-Marcos, nasken nga allukoyen ti maaalyado a pwersa, nangruna kadagiti institusyon a pangkultura kas kadagiti simbaan ken eskwelaan, ken kadagiti adda iti serbisyo a sibil, nga aktibo nga ibunnannag ken babalawen ti korapsyon ken bulok a sistema. Kasapulan nga awiden isuda a pumanig iti rebolusyonaryo a nagkaykaysa a prente.

Nasken nga ibunnannag ken babalawen dagiti ahente ti imperyalismo a US ken ipus ti agar-ari a dasig a grupo kas ti Akbayan iti panangalilaw iti masa ken panangiyaw-awan iti dangadang da.

Rumbeng a tuluy-tuloy a papigsaen ti Partido ti rebolusyonaryo a trabaho iti ballasiw-taaw, iti panagorganisa kadagiti migrante a mangmangged a Pilipino, panangbukel ti internasyunal a nagkaykaysa a

prente nga anti-imperyalista ken panangpapigsa ti sangalubongan a proletaryo a pannakikinnabsat.

Kasapulan a nairut a pagkaykaysaen dagiti migrante a Pilipino kadagiti pagilyan nu sadinno a maiyem-empleyo da tapno labanan ti nadumaduma a langa ti panangidandanes ken diskriminasyon dagiti gangannaet nga amo da, kasta met dagiti parigat a patakaran ken panaglipit ti reaksyunaryo a guberno iti Pilipinas. Nasken a riingen isuda tapno isilpo dagiti panaglaban da iti nailyan-demokratiko a dangadang iti pagilyan ken allukoyen isuda nga agawid ken makipaset iti rebolusyonaryo a tignay.

Buklen ti kalawaan nga iket ti pannakigayyem iti amin nga umili iti amin a paset ti lubong tapno suportaran iti amin a wagas ti rebolusyonaryo a dangadang ti umili a Pilipino. Buklen iti intar da ti kaadwan a grupo a sumupsuporta ken dagiti timpuyog a makigayyem, ken allukoyen isuda a mangibingay iti nailyan ken demokratiko a dangadang ti

umili a Pilipino.

Rebbengen ti Partido nga agibingay iti tuluy-tuloy a panagpapigsa ti sangalubongan a nagkaykaysa a prente nga anti-imperyalista. Kasapulan nga iduron ti Partido ti panagbukel wenno panagpapigsa ti internasyunal nga alyansa nga anti-imperyalista ken dagiti kampanya laban iti imperyalismo a US, nga tatta ket isu ti numero uno nga imperyalista a mangsugsugsog ken mangprobprobokar kadagiti armado a binnusor iti nadumaduma a paset ti lubong.

Nasken nga ituloy a papigsaen ti Partido ti pannakikinnabsat iti nadumaduma a pwersa a proletaryo iti nadumaduma a pagilyan, tapno itandudo ken pasaknapen ti Marxismo-Leninismo-Maoismo ken aramaten daytoy iti praktikal nga aplikasyon iti nadumaduma a pagilyan, Bayat nga awan pay ti basaran tapno itakder ti maysa a sentro nga internasyunal, supsuportaran ti Partido dagiti teoretikal a panagtatalantan, dayalogo ken praktikal a panagtittinnulog dagiti partido ken

pwersa a komunista iti panggep nga allukoyen ti panangbukel ken panagpapigsa ti partido komunista kas taliba dagiti baro a demokratiko wenno sosyalista a rebolusyon iti nadumaduma a paset ti pagilyan.

Agtaltalinaed a kadakkelan a kontribusyon ti Partido iti sangalubongan a tignay komunista ti panangiyabante ti demokratiko a rebolusyon ti umili iti Pilipinas. Tunggal addang paabante ken balligi a nangun-od ti Partido iti panangiyabante ti rebolusyon a Pilipino ket disnog iti imperyalismo a US, kontribusyon ken inspirasyon iti amin a proletaryo a pwersa iti amin a paset ti lubong.

Napalaus ti determinasyon ti Communist Party of the Philippines, kadwa ti amin a rebolusyonaryo a pwersa iti Pilipinas, nga iyabante ti demokratiko a rebolusyon ti umili. Iti sango ti nakasaysayaat a sitwasyon, ken iti usto a panangidaulo ti Partido, matantannawagan ti Komite Sentral nga agmartsa paabante ti naunday a gubat ti umili agturong iti naan-anay a balligi.

**Pangiggeman ken isabiag ti Marxismo-Leninismo-Maoismo!
Gibusan ti imperyalismo, pyudalismo ken burukrata-kapitalismo!
Itag-ay ti Nalabbaga a bandera ti demokratiko a rebolusyon ti umi!
Iyabante ti naunday a gubat ti umili!
Agbiag ti Partido Komunista ng Pilipinas!**